

**Ol NGO
egensim 2000
baset**
- pes 2

**Skate rabisim
gavman
mani plen**
- pes 3

**Ol Bogenvil
straik long kwik
mani bisnis**
- pes 4

**pes 11 - 12
Lukim ol
nius nabaut**

**6 pes
Federesen Sevings
na Lons Sodaiti ripot**

Sir Mekere rausim Pundari long gavman

...Moa senis bai kamap yet

JOE KANEKANE i raitim

GAVMAN i rausim John Pundari olsem namba tu Prait Minista na Minista bilong Hom Afeas, Yut na Wimens long Trinde aste.

Prait Minista Sir Mekere Morauta i tokaut long dispela disisen long rausim namba tu bilong em Mista Pundari wantaim pati, Edvens PNG Pati (APP) long gavman bilong em.

Sir Mekere i tok bai ol i makim nupela Deputi Prait Minista bihain taim Gavman i toktok gut wantaim ol arapela pati i stap wantaim ol.

Prait Minista i tok dispela disisen i kamap bikos long ol pasin na luksave we Oposisen i wok long mekim long pasim tok namel wantaim ol lida traim long bagarapim gutpela ron na stap bilong gavman long ronim kantri i go het.

Em namba wan taim nau Mekere Pundari gavman i mekim wanpela bikpela senis insait long ol gavman minista na ol het man bilong ol narapela gavman dipatmen na ol ogenaisesen bipo long pinis bilong yia.

Dispela tingting i kamap bihain long ol planti kain toktok i bin kamap long blokim baset bilong yia 2000. Dispela ol senis i ken skelim sampela bikpela posisen namel long ol narapela pati husat i stap insait long gavmen na i askim long sampela posisen.

I bin i gat agrimen pinis olsem pati i go pas long gavman Pipels Demokratik Muvmen (PDM) mas kism pastaim sampela posisen.

Ol ministri we ol i lukluk long skelim nau em Helt, Treseri na sampela vais minista posisen. Dispela ol posisen bai ol i skelim i go long ol pastaim long ol pati husat i gat planti memba.

Prait Minista Sir Mekere husat i bin holim ministri bilong Treseri bai nau i larim narapela man i kism bihain long em i kamapim pinis baset bilong yia 2000 long we na pasin we em i lakim long en.

Ol politikil pati husat i stap nau wantaim PDM i bin bung long ol yet long pasim tok long toktok wantaim PDM long wanem kain samting bai kamap bihain long ol tok-save bilong senis bilong ol ministri i kamap.

Ripot long palamen i tokaut olsem gavman i laik go het long mekim ol dispela senis hariap bai ol plen na wok bilong dispela baset i ken go het. Ripot i tok dispela i bikpela wari bilong gavman nau.

Gavman i bin kism gutpela nem tru bihain long em i kism bikpela sapot long pasim dispela baset bilong yia 2000.



Ol manki sialum

• Kenkau Kaisa elementri skul long Sialum, Morobe provins i amamasim opening bilong Sialum distrik het kota long las wik. Ol skul piknini i bilas tumbuna na sanap long asembli. Minista bilong Woks na memba bilong Tewel Siassi Mao Zeming wantaim Dokta Febian Pok i go mekim dispela opening.

Dispela i soim olsem gavman tude bai stap yet i go long yia 2002 jeneral ileksen na dispela tu i soim olsem ol bikman i tingting gut nau long strongim dispela gavman.

Sampela promis PDM i wokim bilong givim sampela posisen i go long ol kolisen memba pati i stap yet. Dispela ol pati em Pangu Pati, Nesenel Pati na Yunaitet Pati.

Ol i bin givim ministri bilong Leba i go long Christ Haiveta husat i lida bilong Pangu Pati. Yunaitet Pati i gat pinis ministri bilong Plis tasol long bikpela namba bilong ol em ol i ken kism narapela ministri tu.

Robert Nagle husat i kamaut long Pangu na Baki Reipa i kam long nupela ileksen i mekim namba bilong Yunaitet Pati i go antap. Yunaitet Pati i bin stap poroman gut wantaim PDM long stat bilong kamapim gavman. Olsem na dispela i klia olsem ol bai kism moa long wanpela ministri long taim senis i kamap.

Paul Pora husat i wanpis memba bilong Nesenel Pati i gat luksave olsem em inap kism wanpela wok ministri tu.

Pangu pati nau i wok long groa long namba na i gat sans ol tu inap kism sampela moa ministri sapos namba bilong ol i kamap long mak bilong strongim marit wantaim PDM na ol arapela pati long gavman.

Ileksen bilong Wabeg memba Daniel Kapi wantaim luksave bilong Ian Ling

Stuckey na Nakikus Konga long go bek Pangu sapos i tru, bai inap mekim kamap dispela senis.

Namba bilong PDM i wok long go antap yet wantaim 38 memba nau taim memba bilong Suave Yauwe Riyong na memba bilong Kagua Erave David Basua i go joinim ol.

Sampela moa bosman bilong ol dipatmen inap lusim wok bilong ol tu long dispela senis bikos sampela senis i kamap pinis. Tok win i raun olsem Atoni Jenerel, eksekutiv dairekta bilong PNG Spots Komisn na Woks seketeri bai i gat senis long ol bosman bilong ol.

Insait toktok i kamap pinis olsem bai tripela hailans provinsal gavman tu bai kism saspensen taim ol dispela senis long ol minista na het bilong dipatmen i kamap.

Sampela memba bilong ol hailans provinsal eksekutiv na kaunsil presiden i stap nau long Mosbi long askim Prait Minista long noken mekim dispela samting. Tupela hailans gavana i stap long Gavman sait na Isten Hailans gavana Peti Lafanama i stap long Oposisen sait. Mista Lafanama i bin vot long Tunde nait long sapotim baset bilong Gavman. Gavman bilong em i stap anit long bikpela wok glasim na i gat bikpela tingting olsem gavman bilong em (Isten Hailans provinsal gavman) bai kism saspensen.

**Noken tingim mani
bilong gol, wel
na ges, lpatas i tok**

YAKAM KELO i raitim

GAVMAN i no ken tingting tumas moa long mani bai i kam long ol bikpela gol na wel maining kampani long Papua Niugini, Gavana bilong Enga provins Peter lpatas i tokaut long palamen dispela wik.

Mista lpatas i tok ol dispela samting bai pinis long bihain taim na bai ol pipel bilong PNG bai painim ples long mani bilong lukautim ol long sevis na developmen.

Mista lpatas i tokaut long baset taim olsem em i laikim gavman i mas putim bikpela mani i go insait long ol wok bilong agrikalisa we wanwan provins i mas kamapim wanpela bikpela agrikalisa projek ol i gat long pulim mani bilong ol pipel. Na dispela tu i ken kamapim moa wok long ol pipel i mekim na ol i ken gat mani long poket bilong ol.


Gavana lpatas i tok gavman i mas lukluk stret long ol projek we i sut stret long asples na dispela projek i mas pulim olgeta pipel bilong ples long stap insait. Na long dispela rot tasol ol pipel bai i gat mani long baim skul fi, baim ol samting ol i laikim, ol bai mekim wok na kamapim bisnis na arapela samting moa we sindaun bilong ol bai kamap gut.

Em i tok gol, kopa, wel na ol bikpela maining risoses bai pinis tasol ol agrikalisa samting olsem kopi, kakao, oil pam, kopra na arapela moa bai i stap yet na lukautim pipel long bihain taim i kam.

Mista lpatas i tok em i bin go long Wes Nu Briten na lukim stret oil pam projek long hap we i soim stret olsem olgeta manmeri i mekim wok na ol i gat mani long oil pam bisnis. Na dispela samting bai strongim na sapotim ol pipel long longpela taim i kam yet.

Olsem na em i laikim gavman i mas tromoi moa mani i go long wanwan provins na ol i ken skelim wanem wok agrikalisa em strong na bun bilong ol. Na ol bai wok hat long em na mekim samting i kamap olsem piksa long oil pam projek bilong Wes Nu Briten provins.

Em i tok long dispela rot tasol, PNG bai i go long taim rot moa long bihain taim na i no inap wetim Wol Beng, Intanesenel Monitori Fan (IMF) o Australia na arapela ovasis kantri long kam helpim mipela. Bikos PNG i gat rot bilong em yet long i go het wantaim developmen na groa bilong kantri long dispela rot nau em i sanapim.





• Ol memba bilong Konstitusenel Developmen Komisin (CDC) i bin mekim raun i go long Australia las mun long lukim na kisim save long we bilong Australia long ronim ol politikel pati sistem bilong ol.

CDC grup i wok long traim kamapim senis o lo bilong politikel pati insait long kantri nau long traim daunim planti hevi we i save kamap long ol memba long taim bilong ileksen, taim bilong makim gavman long palamen na tu taim bilong kem long fomim gavman. Planti stil na hait pasin o birua pasin i save kamap.

Ol CDC memba i sanap long fran bilong Australia haus palamen wantaim siaman Yauwe Riyong memba bilong Suave na memba bilong Kabwum Ginson Saonu.

Tasol long dispela wik long haus palamen, CDC i no bin kamapim dispela lo bilong politikel pati. I nogat ripot yet long wanem taim bai ol i kamapim dispela lo. Tasol palamen bai kam bek long mun Mas long neks yia, yia 2000.

Madang Paia Sevis i sot tru long mani

RACHAEL KEAEKE i raitim

MADANG Paia Sevis stesin em wanpela pablik sevis we Madang Provinsel Gavman i lus tingting long en na i no bin skelim mani i go insait long lukautim insait long 1999 Baset.

Madang Paia Sevis stesin Komisina Samson Polly i tokaut long dispela. Na em i hop Madang Provinsel Gavman bai luksave long dispela hevi na putim sampela mani i go insait long ronim Madang Paia Sevis stesin long yia 2000 Baset.

Em i tok Madang Paia Sevis stesin i mas gat samting olsem K50,000 bilong stretim dispela stesin long wanem dispela stesin i winim pinis 30 krismas.

Em i tok wanpela bikpela hevi i olsem i no bin gat inap mani insait long Madang Provinsel Gavman baset bikos Nesenel Gavman i bin katim sampela mani i go long Madang long dispela yia.

Em i tok stat long 1969 taim ol i mekim dispela stesin i kam inap tude nogat wanpela wok i kamap bilong stretim stesin.

Mista Polly i tok ol arapela provinsel gavman i bin putim mani i go insait long lukautim na ronim ol provinsel paia sevis bilong ol tasol Madang gavman i bin lus tingting olgeta long Madang Paia Sevis.

Em i tok Madang gavman i bin putim mani i go insait long helpim ol plis bilong Madang na tu ol woda long Bepn tasol ol i lus tingting olgeta long Madang Paia Sevis.

Long stat bilong dispela yia, Nesenel Gavman i bin gimv wok bilong lukautim ol Paia Sevis, Pils Sevis, na Woda Sevis i go long han bilong ol provinsel gavman.

Mista Polly i tok em i bin salim baset bilong Paia Sevis i go long Madang Provinsel Gavman tasol ol i no mekim wanpela samting long dispela baset.

Em i tok ol pipel i save baim takis i go long gavman bilong baim ol gavman wok man na meri. Olsem tasol, ol wok man meri bilong paia sevis i kisim pe i kam long ol pipel na ol i gutpela ol i mas gimv gutpela sevis i go long ol pipel.

Skate rabisim 2000 baset

YAKAM KELO i raitim

OPOSISEN lida Bill Skate i tok dispela baset bilong yia 2000 we Mekere Pundari gavman i kamapim i wanpela giaman baset tru.

Mista Skate i rabisim tru dispela baset bilong gavman na tok baset ya em bilong ol bisnisan, ol bikpela save lain tasol na ol lain bilong taun na siti. Na dispela baset i no inap tru sevim gut ol grasrut pipel bilong Papua Niugini.

Mista Skate baset i no lukluk gut long strong ol wok bilong stretim ol rot, bris, helt sevis, edukesen, lo na oda na planti arapela eria moa we ol grasrut i save kisim helpim tru long en.

Dispela baset i sut tasol long sait bilong wokim moa mani na bisnis we em ol bisnis-lain na save lain tasol bai amamas bikos em hap bilong ol long kisim sapot na strong long mekim wok bilong ol, Mista Skate i tok.

Mista Skate i tok strong tu olsem bikpela hap mani bilong gimv i go long ol wok na developmen bilong kirapim ol ples bai lus nating long ol taun na siti bikos planti pablik

sevans wokmanmeri i no pinis. Dispela gavman i holim ol gen long wok we ol bai yusim bikpela mani tru.

Mista Skate aninit long olpela gavman bilong em i bin kamap wantaim polisi we olgeta pablik sevans husat i abrusim taim i mas pinis aninit long ritrens program na go bek mekim wok tru long ples o distrik we wok bilong rifom i go daun long ol distrik nau. Skate gavman i bin laik pinisim samting olsem 6,000 pablik sevans wokmanmeri insait long ol nesenel dipatmen na tu long ol provinsal dipatmen. Tasol Mekere Pundari gavman i kamap gen na stapim na holim olgeta lain i stap bek long wok bilong ol.

Mista Skate i tok sapos planti pablik sevans wokmanmeri i pinis o ritrens, planti bikpela hap mani inap go long ol wok bilong skul, haus sik, sios, rot, bris na planti arapela moa. Na tu save bilong ol dispela pablik sevans lain bai ol i ken go yusim gut long ples aninit long nupela rifom program nau i kamap na wok.

Oposisen lida i no amamas tru long lukim olsem ol ausait ovasis lain na beng i wok long gimv stia tingting na tokim gavman bilong PNG long wanem samting PNG i

mas mekim.

Em i tok PNG i mas sanap bilong em yet na ol poroman long ovasis i mas gat rispek na larim PNG yet i mekim ol disisen na ronim ol wok long save na tingting bilong em yet.

Em i tok baset i soim luksave olsem ol ovasis kantri na Wol Beng wantaim Intanesenel Monitori Fan (IMF) i stap insait long mekim baset plen. Bikos dispela baset i sut long sait bilong bisnis na pulim mani we ol mani lain tasol wantaim ol save lain tasol inap mekim na kisim helpim na ol turangu grasrut lain bilong Papua Niugini bai i nogat tru.

Mista Skate i tok dispela gavman i bilasim gut tru dispela baset bilong yia 2000 long mekim ol manmeri i bilip olsem em i gutpela baset tru bilong sevim PNG. Tasol samting tru, em baset we bai putim PNG long bikpela danau long Wol Beng na ovasis na tu putim PNG i go insait long bikpela hevi tru long bihain taim.

Mista Skate i mekim ol dispela toktok long Tunde dispela wik long mekim bekim bilong em long 2000 nesenel baset gavman i bin kamapim long las wik.

Ol provins i no save kisim mani stret, Pokawin i tok

GAVANA bilong Manus Steven Pokawin i tok em i amamas na sapotim yia 2000 nesenel baset bilong gavman. Tasol em i pret tasol long rot o sistem mani i save go long en i go daun long ol provins.

Mista Pokawin i tok dispela rot bilong mani i save bihainim long Fainens opis i go daun long wanwan provinsal gavman i save hat tru we planti hevi isave kisim tru ol provins long planti taim i kam. Mani i no save kamap hariap o i no save go gut olsem na planti wok, projek na sevis i no save

kamap gut tu bikos mani i no go ful, tasol i go hap hap tasol o no kamap hariap.

Mista Pokawin i tok dispela em bikpela hevi bilong provinsal gavman na em i laikim dispela rot i mas op gut na ron bilong mani i go daun long ol provins i mas klia bai ol provins tu i ken ronim wok bilong ol stret na ol wok bai ken kirap gut bihainim mani ol i kisim.

Em i tok mani i save kam long wanwan kota na sampela taim mani no kam ful na taim ol i brukim na skelim long wanwan pro-

jek, ol projek i no kisim ful mani bilong wok bilong ol na ol i save wok hap hap tasol.

Nau klostu long krismas sampela mani i go kamap tasol dispela mani i kamap long ron taim bikos sampela taim hevi bilong ren i save mekim hat long wok bilong rot o ol mentenens wok i kamap.

Gavana Pokawin i tok dispela em hovi bilong olgeta provinsal gavman na em olsem siaman bilong olgeta provinsal gavana insait long kantri em i makim ol long autim dispela wari na hevi bilong ol.



WANTOK

NIUSPEPA BILONG YUMI OL PAPUA NIUGINI STRET

Givim sans long Mekere baset

Nesenel palamen i pasim pinis baset bilong yia 2000 long Turide nait. Dispela em mani plen bilong Papua Niugini long neks yia na sapos dispela mani plen i wok gut, bai ol pipel bilong PNG i ken lukim ol gutpela senis we ol i ken kisim amamas long en. Sapos baset i no wok gut, ol pipel bai pilim sampela hatpela samting i kamap long laip na sindaun bilong ol.

Planti toktok salens i kamap pinis long dispela baset. Ol Non Gavman Ogenaisesen (NGO) wantaim Oposisen i salensim tru na rabisim dispela baset bilong gavman. Tasol gavman isanap strong olsem dispela em wanpela gutpela baset tru bikos baset ya bai rausim planti dinau bilong bipo na stretim rot bilong ol wok na developmen i ron long en.

Dispela baset tu i bin kisim bikpela helpim long mani i kam long Wol Beng na IMF na tu long Saina na Australia gavman. Olsem na sapat bilong ol ovasis tu i stap long kamapim baset bilong PNG.

Oposisen i tok dispela baset i no bilong ol grasrut. Olsem na ol grasrut bai pilim pen na hevi long neks yia. Oposisen i tok dispela em baset bilong ol bisnis lain, ol saveman na ovasis bisnis lain long mekim sindaun bilong ol i gutpela. Bill Skate i tok em bai wet na lukim kaikai bilong dispela baset long neks yia.

Tasol planti saveman bilong mani o bisnis na ol lida i tok dispela em gutpela baset bilong kantri na ol i sapatim. Ol i tok dispela baset inap sevim kantri long bihain na putim PNG long gutpela rot bilong mekim em i strong long sanap resis long ai bilong ol arapela ausait kantri long wol.

Ol pipel i tait long wetim kwik mani

PLIS long Buka, Bogenvil i stap was tasol nogut sampela trabel i kamap long wanem planti pipel husat i bin putim mani bilong ol wantaim ol lain bilong fas mani skim i no peim ol yet.

Long dispela wik tasol ol plis i askim ol dispela mani skim long hariap na baim ol investas bilong ol long stapim trabel.

Provinsel Plis Komanda long provins Sif Inspekta Joel Kean i tok nau yet planti pipel i kam long longwe hap olsem Buin, Siwai na Nissan long wetim ol lain long peim ol. Tasol pe aut ino kamap yet.

Sif Inspekta Joel Kean i tok ol dispela pipel i lusim planti mani long baim fiul na balus long kam long Buka long traim na painim ol mani bilong ol.

Em i tok las wik ol plis i hariap long stapim sampela trabel i kamap bikos ol sampela pipel i laik paitim ol wokman bilong ol dispela mani skim.

Dispela tupela mani skim em long U-Vistract Corporation na Moneylink.

Sif Inspekta i tok: "Olgeta de ol pipel i wok long kam long opis bilong mi na askim wanem taim ol bai kisim pe aut na mi kem lukim olsem klostu bai trabel i kamap long dispela samting."

Em i tok olsem planti kamap long Buka bikos ol i harim olsem ol mani skim i redi nau long baim ol kastoma bilong ol.

Dispela wik tu wanpela long ol dispela mani skim ya U-Vistract i putim wanpela

advetismen insait long wanpela niuspepa long toksave long ol kastoma olsem klostu nau bai ol i mekim ol pe aut.

Dispela advetismen we i kamap i gat mak bilong siaman bilong bot na i tok olsem nau yet ol i wetim tasol dairekta husat i stap yet ovasis. Notis i ok tu olsem olgeta samting bilong mekim dispela pe aut i stret pinis.

Long mun Septemba 1999 Gavman i bin makim Disemba 10 (tumora) na tokaut long olgeta mani skim ya long mekim pe aut long pastaim long dispela de.

Wanpela man husat i gat atoriti long givim toktok konsenim ol dispela mani skim em long Benny Popoitai tasol Wantok i no tok tok long em dispela wik bikos em i no stap.

Gavman brukim K22.6 milien long Bogenvil

2000 Nesenel Baset

OPOSISEN lida Bill Skate i no amamas tru long lukim olsem dispela Gavman i no brukim gut mani long stretim ol wok na hevi bilong Bogenvil.

Mista Skate husat em olpela Praim Minista long 1997 i kam inap Julai dispela yia i bin mekim bikpela tok kros tru taim em i lukim olsem dispela baset i no skelim gut mani long ol hevi na wok bilong stretim gen sindaun na ol bagarap long Bogenvil ailan.

Mista Skate i tok Gavman bilong em i bin lukim Bogenvil olsem wanpela bikpela hevi bilong Papua Niugini na i bin mekim olgeta wok na givim bikpela sapat na strong bilong gavman i go long ol hevi na wok bilong Bogenvil ailan.

Dispela wik long haus palamen, Mista Skate i mekim tok strong olsem planti bikpelea wok bilong stretim olsem haus sik, skul, wok bilong ol sios, lo na oda na arapela moa i mas kisim helpim mani bilong karimaut ol wok bilong ol.

Mista Skate i tok em i sori tru long lukim olsem dispela gavman bilong Sir Mekere na Pundari i lukdaun long Bogenvil na ol hevi em i gat i stap.

Nesenel gavman i brukim K22.6 milien long yia 2000 baset bilong Not Solomon provinsal gavman.

Baset i karapim ol eria olsem, eminstresen grent K2.4 milien, stafing grent K2.3 milien, pe bilong ol tisa K10.4 milien, lif pe bilong ol pablik sevans K58,000, lif pea bilong ol tisa K71,000, ekonomni ikwiti K3.3 milien, infrastraksa developmen grent K2 milien, lokol level gavman grent K2 milien na Taun na Eben Sevises grent k10,000.



Redio Is Nu Briten pairap moa

• Nupela redio stesin bilong Is Nu Briten long Kokopo i pairap moa na planti ol pipel i amamas long harim gutpela program i kamap long dispela. Foto: Joe Kanekane.

WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

| PLES | AIR |
|-----------------------|-----------|
| PNG | K 68.00 |
| Ostrelia na Nu Silan | US\$46.00 |
| Esia Pasifik na Japan | US\$55.00 |
| Amerika na Yurop | US\$95.00 |

Manus baim K50,000 sea wantaim NGC

YAKAM KELO i raitim

MANUS Provinsal Gavman i givim K50,000 i go long Nesenel Ges Kopresen kampani (NGC) long las wik olsem namba wan provinsal gavman long baim sea wantaim NGC.


Gavana bilong Manus Steven Pokawin taim em i givim K50,000 sek mani i go long siaman bilong NGC Alfred Kaiabe i tok Manus provins em wanpela liklik provins insait long kantri we ol i save kisim long taim tru long kamap wantaim dispela kain mani.

Mista Pokawin i tok nau ol i painim dispela K50,000, ol i laikim bai NGC i mas gat gutpela menesmen tim bilong go pas long dispela kampani long mekim gut wok we ol provinsal gavman i ken kisim gutpela win mani bilong ol long bihain taim.

Mista Pokawin i tok NGC i mas gat ol gutpela saveman long mekim ol dispela wok bilong kampani na tu i no ken gat ol politikis lain i stap insait long bod we inap bagarapim gutpela wok bilong kampani. Em i laikim dispela kampani i mas stap longwe long pasin politikis bai wok bilong ol i ken ron long save bilong ol wokman stret bilong dispela wok.

Gavana i tok em i laikim dispela kampani i mas wok strong long em yet bai em i noken pundaun long wanpela hevi bilong ol ausait lain husat i laik subim ol i go insait long ron bilong kampani.

Dispela kampani Nesenel Ges Kopresen (NGC) i kamap aninit long lo we palamen i pasim na em bai wok



• Gavana bilong Manus Steven Pokawin.

wantaim olgeta provinsal gavman na ol papagraun. Lo i tok bai olgeta provinsal gavman i mas baim sea bai dispela kampani i sanap olsem kampani bilong ol pipel bilong Papua Niugini stret.

Siaman Alfred Kaiabe i tok ol papagraun bilong wel na ges projek long Sauten hailans na Galp provins i no givim yet sea bilong ol. Wankain tu ol arapela provinsal gavman i no baim yet sea bilong ol wantaim NGC olsem lo i tok long en.

Kampani tu i wet yet long nesenel gavman long givim ol K4 milien bilong ol i kirapim wok wantaim.



BIAZ INSAIT LONG BALUS BIABIA WETIM OL HOSTESS LONG KAM...

HOI, LENIA! DIS WE, PLISS!!

NA BIABIA I BEKIM...

EM TRU TRU KOPI, O? !?

NAU OL I KARIM TI NIA KOPI I KAM NA ASKIM BIABIA...

YU LAIKIM TI OKOPI!

NA YU TING EM GIAMAN GIAMAN KOPI AHZ! !!

!!

Luteran sios holim semina long Goroka

SAPE METTA i raitim

Long wik i go pinis St John Luteran sios long wes Goroka long Isten Hailens i bin holim tupela de semina we ol saveman bilong Luteran sios long Lae na Goroka yet i bin kamap long skulim ol man, meri na pikinini long ol kain kain toktok i wok long kamap tude. Sampela bilong ol topik we ol i toktok long en em: bagarap bilong kina, hevi bilong kompyuta (Y2K) na ol narapela kain kain toktok we i kamap namel long long ol pipel. Ol i lukluk tu long wanem samting em Baibel na Kristen tiologi i toktok long ol dispela samting.

Moa long 3,500 manmeri i bin kamap long dispela bikpela semina. Dispela ol lain i kam long

Kainantu, Okapa, Lufa, Henganofi, Bena Bena, Asaro na Daulo insait long Isten Hqilens. Sampela lain tu i kam long Simbu na Westen Hailens long bung bilong dispela semina.

Ol saveman husat i bin go pas long dispela semina em Mista Gomi Gipe, em wanpela leksra bilong ekanomiks long Univeseti bilong teknologi long Lae, Dokta Musawe Sinebare, em wanpela sinia leksra long UPNG Goroka kempas, Dokta Maikel Rynkiewicz, em wanpela profesia bilong antropologi long Melanesian Institute long Goroka na Reveren Jim Baital, sinia pasta bilong ELCPNG long Lae.

Ol narapela saveman husat i sapos long kamap long dispela semina tasol ol i no kamap em

Dokta Zirajuki Kemung, prinsipel bilong Martin Luther Seminar long Lae na Dokta Ulrich Bergmann, dairekta bilong Bundum Konfrens Senta long Lae.

Tupela man ya i no bin kamap long Goroka bikos ol i bin i gat sampela wok long Lae. Tupela i bin salim tok sori olsem tupela i no inap kamap long dispela semina.

Bikpela lain manmeri i bin kamap long namba wan de bilong dispela semina long harim na save gut long toktok bilong kompyuta bikos planti long ol i paul na long long nambaut i stap.

Man husat i bin go pas long skulim ol manmeri long kompyuta hevi Dokta Sinebare i tok em i tru olsem planti kompyuta bai i ken bungim hevi long yia 2000. Tasol ol

manmeri long ples i no ken poret nating. Dokta Sinebare i tok nau yet em planti manmeri i wok long bagarapim tingting bilong planti ol lain pipel na i wok long pretim ol wantaim ol kain kain toktok bilong hevi em ol kompyuta bai kamapim long yia 2000.

Em i tok kompyuta binatang (bug) em i no bikpela samting. "Em i wanpela kain liklik samting we i save i stap insait long kompyuta na i save skelim ol namba. Na bikos ol saveman bilong kompyuta i no tingim gut na stretim dispela samting, i luk olsem sampela hevi bai kamap long ol kompyuta long midnait yia 2000", Dokta Sinebare i tok.

Dokta Sinebare i tok ol kain samting olsem bai kamap tasol

dispela i no min olsem dispela graun bai pinis. Planti manmeri long nau yet i wok long bagarapim tingting bilong ol arapela long ol kain toktok olsem kompyuta bai blekaut na Jisas bai kam bek.

Dokta Sinebare i tok em yet tu em wanpela bilip man tasol em i tok em i no bilip long ol kain kain toktok olsem kompyuta bai bungim hevi na tu Jisas bai kam bek gen long sem taim long yia 2000.

Em i tokim ol bilip manmeri bilong Luteran sios long sanap strong na no ken putim yau long ol dispela lain husat i save sanap long ol kain kain kona na tromoi planti maus wara toktok. "Nogut bai yupela i kamap long long olgeta na lusim bilip bilong yupela", Dokta Sinebare i tok.

Pastoral leta bilong ol bisop bilong Papua Niugini na Solomon ailan long makim Jubili yia 2000

Bikpela Jubili Yia em i taim bilong amamas

Long laip bilong yumi i gat kain kain de bilong amamas. Yumi save amamas long taim nupela pikinini i kamap, long taim bilong meri, long taim bilong pinisim trabel na taim yumi bungim gutpela wantok o pren. Dispela em i gutpela kastom bilong yumi.

Bilong wanem yumi selebretim Jubili 2000?

Planti lain ol i pret, na ol i tok long yia 2000 samting nogut bai kamap tu ol i wari long dispela. Tasol nogut? Em i tru, Jisas i kamdaun long graun, na 2000 yia i go pinis, tasol dispela em i no samting bilong wari. Em i samting bilong amamas.

Pop Jon Pol II i bin askim Sios long statim ol selebresen bilong Jubili Yia insait long spesel liturgi long nait bipo long Krismas. Dispela Jubili Yia na ol selebresen bai go inap long Pes de Bilong Epifani long yia 2001. Em namba 2000 Betde bilong Kraus ol Kristen i wok long selebret. Ol i no selebretim nupela Milenium.

Jisas em i Ridima bilong yumi. Em i winim pawa bilong Satan, birua bilong yumi. Nau yumi amamas long dispela samting. Jisas, pikinini bilong God i kamap man na i serim tingting na laip bilong God wantaim olgeta manmeri bilong graun na i brukim strong bilong sin na strong bilong idai. (lukim: Rom 6. 14; Kol 1.3).

Bikos Jisas i kamap sevis bilong yumi olgeta, yumi laik tok tenkyu long dispela Jubili yia. Na yumi laik liptimapim nem bilong Jisas na amamas long betde bilong em. God Triwan i pogivim olgeta rong bilong yumi na i em singautim yumi long pas tru wantaim Jisas na kamap brata susa bilong em.

Yumi selebretim Jisas i kamap olsem kompensesen

Wanem samting tru i bin kamap long 2000 yia i go pinis? Em i dispela God i soim marimari bilong em long laip bilong Jisas. Taim Jisas i kamap man God i kam klostu long olgeta manmeri na em i pogivim ol sin bilong ol. Tu tausen yia i go pinis na God i mekim dispela wok yet long nem bilong Jisas.

Jisas i bin mekim bikpela wok long baim bek yumi na dispela i



• Sanap long dispela poto em sampela bilong ol lain Katolik Bisop bilong Papua Niugini na Solomon Ailan husat i bin kam na stap insait long dispela bikpela Katolik Bisop Konpres long Sen Josep Peris long Pot Mosbi long yia 1994.

oslem bikpela kompensesen long olgeta samting nogut yumi bin mekim. Em i no baim yumi long wan tausen o long wan milien kina. Nogat. Em i no kilim wan handret pik o muruk. Nogat. Em i baim yumi long laip na idai bilong em yet.

Yumi selebretim Jisas i kamap olsem Braidprais bilong yumi

God i save laikim ol manmeri olsem wanpela gutpela man i save laikim meri bilong em. Taim man na meri i laik marit, lain bilong man i givim braidprais long lain bilong meri. Dispela i save givim amamas long tupela lain wanaim. Olsem tasol, God i givim pikinini bilong em, oslem braidprais bilong maritim na pas wantaim ol pipel bilong em. (Hos 2. 14-23).

Long dispeal marit kontrak namei long God na yumi bikpela amamas i kamap namel long yumi na God. Bikpela braidprais em i Jisas yet. Nogat narapela braidprais i winim dispela. Maski hamas pik, muruk, o kina sel bilong yumi. Jisas i winim ol dispela samting. Dispela em i as bilong bikpela amamas tru.

Bai yumi mekim wanem samting long selebretim Jubili 2000?

Taim ol pipel i givim kompens-

esen na ol i bung long kaikai muru, ol i save kamap wanbel gen. Ol i stretim olgeta rong namel long ol. Olsem tu taim ol lain i givim braidprais, man wantaim meri bilong em i amamas na kirapim nupela sindaun isnait komyuniti. Jisas yet i olsem kompensesen na braidprais long bungim yumi wantaim God.

1. Soim pasin bilong tenkyu

Bikos God papa i stretim yumi long nem bilong Jisas, yumi mas bilip tru long Jisas na long dispela marimari bilong God. Yumi mas soim dispela bli long gutpela pasin bilong yumi.

Strongpela bilip bilong yumi em i nambawan pasin bilong soim tok tenkyu long God. Narapela we bilong givim bikpela tenkyu long God em i psin bilong stap wanbel wantaim olgeta arapela manmeri.

2. Soim pasin bilong pogiv

Pasin bilong pogiv i mas kamap stret long bel bilong yumi. Dispela i min olsem yumi mas pogivim ol husat i bin bagarapim yumi bipo, na nau. Yumi mas mekim promis bai yumi no bekim rong long ol. Lain na famili bilong yumi i mas wok olgeta taim long kamap wanbel.

Mipela ol bisop bilong Papua

Niugini na Solomon Ailan i tokaut long stretim ol samting i no stret long dispela taim bilong Jubili Yia.

3. Helpim komyuniti bilong yumi

Laip na tok bilong yumi mas soim gutpela tok na pasin na lo na eksampel bilong Jisas. Pasin bilong Jisas i mas gro moa long ol famili na komyuniti na long kantri bilong yumi bai wan wan famili na wan wan komyuniti na kantri tu i ken kamap piksa bilong kingdom bilong God. Yumi olgeta i gat wok bilong helpim na strongim famili na komyuniti na kantri bilong yumi bai olgeta manmeri i ken i stap gut insait long bikpela famili bilong God.

Mipela ol Bisop i laik tokaut strong long yupela ol manmeri i wok long strongim mi pasin wantaim pasin jeles na pasin bilong spak na i no save respekim narapela na yusim gan bilong bagarapim manmeri na smukim spak brus na i nogat gutpela tingting insait long laip. Dispela Jubili Yia em i gutpela lain bilong God. Em i taim bilong harim singautim bilong God long kam bek long em na bung wantaim long kirapim gutpela sindaun bilong komyuniti long nem bilong bikpela bilong yumi Jisas Kraus.

Mipela ol Bisop i laik strongim wok bilong ol lida bilong pasin, na saptim wok bilong stretim wari namel long ol pipel bai gutpela sindaun i ken kamap insait long kantri bilong yumi. Bikpela wok tru i stap long han bilong yumi ol lida. Dispela samting i mas kamap ples klia. Strepela na gutpela pasin na pasin bilong sevis i mas stiaim tingting bilong yumi long helpim ol pipel (lukim Esekial 34. 2-10).

4. Mekim wok bilong Jisas i go het

Long pasin bilong amamas long wok bilong God na long pasin bilong pogiv bilong yumi, yumi kamap tru pipel bilong God. Pipel bilong God em i oslem famili i bung wantaim long mekim wok bilong Papa bai i go het.

Jisas i promis bai em i stap wantaim yumi inap long dispeal graun i pinis (Matyu 28.20) na i promis bai em i stap namel long husat manmeri i bung long nem bilong em (Matyu 18.20). Dispela promis bilong Jisas i save strongim yumi long mekim wok bilong em go het.

Strong bilong God bai i stap wantaim yumi. Amamas bilong Jisas Kraus i win long idai i mekim yumi i kamap manmeri bilong laip na bilong laip. Pawa bilong Spirit i helpim yumi long kisim strong na kamap nupela manmeri bilong autim gutnius bilong Jisas i go long ol manmeri bai ol i ken kisim save long em.

Maria mama bilong Jisas na mama bilong yumi, i ken bungim na helpim yumi long kamap brata susa aninit long bikpela pawa na amamas bilong Jisas.

Mipela ol Bisop bilong Papua Niugini na Solomon Ailan i tok olsem: Amamas bilong Jisas i stap wantaim yupela long olgeta de bilong laip bilong yupela. Tupela i no ken pret long yia 2000 na long ol yia i kam bihain. Yumi mas trastim God na bilip long em.

Jubili bilong yia 2000 em taim bilong amamas long nem bilong Jisas!



Hailans Nius

Kaupena - Orei rot bagarap long SHP



• Mema bilong Goroka Open, Henry Smith i amamas long givim K20,000 i go long Goroka Rurel na Eben Kaunsil las wik.

JOE KANEKANE i raitim

ASKIM bilong ol papa graun long gavman i peim K200,000 kompensen mani long ol ol pipel i slip arere long Okuk haiwei long Kaupena na Orei i wokim na rot namel long dispela tupela hap i bagarap olgeta.

Nau yet long sampela hap bilong dispela rot graun i bagarap na ol draiva i painim rot bilong ol yet long go na planti taim ol i save go long narapela sait bilong rot.

Nau long taim bilong rein i luk olsem ol rot bai bagarap olgeta na ol lan husat i wok long yusim dispela rot bai kisim bikpela taim tru long ol ka bai bagarap tu long dispela rot.

Ol ripot i kam long enjinia long Mendi tok Woks dipatmen i tok ol wokman no inap go long dispela hap na statim sampela wok long wanem ol papagraun sanap strong long toktok bilong ol olsem gavman i mas peim K200,000 kompensesen pastaim.

Wanpela enjinia i tok planti taim ol wokman i askim ol papagraun long halivim ol tasol ol i no bin laik wokim wanpela samling olsem na rot i stap nogut olgeta.

"Ol papagraun i tok olsem gavman i no peim kompensesen long dispela graun olsem na ol i no laik wok i kamap long dispela rot inap ol i kisim mani bilong ol," em i tok.

Em i tok Woks dipatmen i wari olsem dispela rot em wanpela wei tasol we olgeta saplai bilong Sauten hailens i save go kamap na sapos wanpela

samting i no kamap hariap bai rot i bagarap.

Em i tok taim ol sekap wantaim Lens dipatmen long painim aut sapos ol i peim dispela graun ol lain long Lens dipatmen i tok i nogat rekot long hap bilong ol.

Long dispela as em i hat long luk-save sapos ol papa graun i tok tru o nogat long wanem ol i strongim toktok bilong ol olsem dispela tingting bilong ol i mas kapam pastaim long wok i kamap.

I gat bilip olsem hevi i kamap bikpela taim kampani husat i kisim kontrak long putim kolta name long Togoba na Kisenepoi i no peim ol papa graun tasol ol i no mekim wanpela samling.

Taim Woks long Mendi i kisim lukaut bilong dispela rot ol papagraun i askim Mendi woks long luksave long dispela hevi.

Long sampela narapela nius ol papagraun long Orei bris i kisim pinis mani bilong ol hap graun we bris i sanap long em.

Ol i askim pinis Woks dipatmen long stretim dispela bris long wanem planti lain i bin kisim hevi long wanem bris i liklik tumas na tu graun i karamapim narapela hap bilong dispela hap.

PPC bilong Westen Hailens Allan Kundi i bin tok aut long niuspepa olsem ol rot i bagarap i wanpela bikpela as we planti ka i save kisim rot birua.

Em i tok sapos dispela ol rot i kamap gut bai nogat planti rot birua na ol provinsel gavman i mas givim sampela lukaut i go long dispela hevi.

Ripot olsem man i dring blut i kamap long Hagen

PIUS MON i raitim

TUPELA liklik skul meri long Hagen United Praimeri skul i bin kirap nogut long lukim wanpela man i dring blut bilong tupela.

Tupela liklik meri ya em Helen Alua na Jesse Mamb i bin pinis skul na i go sindaun wetim papamama bilong ol long kam kisim tupela taim wanpela man i bin kamap na sutim beksait bilong Jesse na i stal long pulim blut bilong Jesse long maus na dringim.

Papa bilong Helen, Mista Robert Alua i tok taim dispela man i wok long pulim na dringim blut long beksait bilong Jesse i stap. Helen i lukim na pusim dispela man i go daun long graun.

Em i tok taim man ya i pundaun go daun long graun, em i kirap gen na sutim lek bilong Helen na stat dringim blut long lek bilong Helen gen.

Taim ol papamama i kisim tupela i go long haus sik, ol dokta i no inap painim wanpela bikpela trabel o bagarap long lek bilong Helen.

Mista Alua i tok taim ol i go long haus sik, ol dokta i tok dispela em wanpela kain samling tru we i no save kamap bipo na ol i no inap mekim wanpela samling long en.

Mista Alua i tok long lek bilong Helen i gat wanpela bikpela mak bilong nil we blut i kam long en na tu i gat sampela liklik mak bilong nil tu long sait sait bilong lek bilong Helen.

Taim ripot i kisim Mista Mamb (papa bilong Jesse) em i tok i nogat wanpela bagarap o asua long pikinini bilong em.

Em i tok tu olsem i nogat wanpela mak bilong sua samling long beksait bilong Jesse taim dispela toktok i kamap.

Mista Alua i tok sapos ol skul i laik pasim skul, ol papamama i mas kisim klia toksave pastaim bai ol i mas kamap stret long taim na kisim ol pikinini bilong ol i go long haus hariap. Dispela i ken mekim ol skul pikinini i abrusim ol birua bilong ka long rot, raskol pasin na ol eksiden nabaut we inap kamap.

Dispela em wanpela kain nupela samling o ripot tru we i kamap long Hagen taun.

Ipatas laikim Gavman skelim gut baset long Enga provins

YAKAM KELO i raitim

GAVANA bilong Enga provins Peter Ipatas i askim Gavman long stretim Enga haus sik na tu Laiagam haus sik wantaim haus kalabus na wok bilong wanpela Nesenel Kot Jas long Enga provins long neks yia.

Mista Ipatas i mekim dispela toktok i go long Praim Minista Sir Mekere Morauta long taim bilong toktok long yia 2000 baset long palamen dispela wik.

Mista Ipatas i tok provins bilong em insait long kantri i save kamapim bikpela mani tru long wok bilong Pogera olsem na insait nesenel baset, Gavman i mas lukluk gut long sait bilong stretim ol sevis na wok long provins bilong em.

Mista Ipatas i tok Enga haus sik i bagarap na nogat gutpela helpim bilong Gavman i go long stretim wok bilong haus sik i ron gut gen. Na tu Laiagam haus sik

i bin bruk daun pinis na em i laikim Gavman insait long nesenel baset i mas stretim dispela tupela haus sik long provins bilong em.

Mista Ipatas i tok tu olsem haus kalabus long Enga i mas kamap gut bikos longpelea taim i kam i bin nogat haus kalabus long provins bilong em. Olsem na Gavman i mas stretim dispela samting long strongim wok bilong lo na oda insait long kantri.

Em i laikim tu long wok bilong lo na oda bai wok gut sapos Gavman i stretim gut tu baset bilong lukautim wanpela fultaim Nesenel Kot Jas long Enga provins long em i ken sindaun gut na harim ol kot na pinisim ol hevi bilong kot we i save kamap long provins.

Gavana Ipatas i tok sapos kot sistem wantaim haus kalabus i stap wantaim bai mekim wok bilong lo na oda i go gut long gut-

pela sindaun bilong Enga provins.

Em i tok Enga provins mas givim moa sapos yet long kantri na Gavman long Pogera gol maining bikos gol maining na i stap narapela 18 krismas samting. Olsem na taim Gavman i luk brukim baset bilong kantri em i mas tingim ol bikpela mani bai Enga provins i kamapim bilong kantri na stretim tu ol hevi long ol wok bilong sevis na development long provins bilong em.

Em i tokaut olsem em na sapatim dispela yia 2000 nesenel baset bikos bigeta memba i save sapatim baset long mekim baset i wok long olgeta yia. Olsem na long mekim baset i wok, em i mas sapatim, maski em i gat hevi long mani i bilong provins bilong em i no inap long mak provins i mas kisim. Tasol em i laikim Gavman i mas skelim gut baset long provins bilong em.



NATIONAL CAPITAL DISTRICT COMMISSION

Publik Notis

Gordons na Tokarara Maket i pas


NCDC i laik toksave long publik olsem Gordons na Tokarara Maket bai pas long lik liktaim tasol, ol bai mekim bikpela mentennans na upgrading wok.

Ol maket sevis bilong ol arapela maket bai go yet na ol bai salim buai long sampela hap tasol insait long siti


NCDC i tok sori sapos dispela i kamapim sampela hevi.

Tenk yu


JAMIE MAXTONE-GRAHAM
Siti Administreta



Lae Nius



Wok bilong Simban bris i stat nau

Stori na poto: HENZY YAKAM

WOK bilong kirapim nupela bris long wara Simban insait long Wod 16 eria long Siassi Ailan bai kamap klostu nau. Dispela bris bai bungim olgeta liklik han rot i raunim ailan ya.


Minista bilong Woks na Implimentesen na tu Memba bilong Tewai-Siassi Mao Zeming i givim K25,000 i go long wantu kirapim dispela bris.

Zeming i givim mani ya i go long Woks Dipatmen long Lae husat bai lukautim dispela wok bilong bris na bai baim ol kontrakta.

Taim dispela bris i pinis, moa long 1000 pipel insait long Gauru eria na tu ol ples klostu bai i gat rot i joinim Bunsil gavman stesin wantaim Sauten eria bilong bik ailan, Siassi.

Dispela rot bai helpim ol pipel long salim ol kaikai, kopra na kakao na tu pis i to long Bunsil long salim i go long Lae long bikpela maket na tu salim i go long ovasis.

Mista Zeming i mekim wankain singaut gen long



ol pipel i mas stat long stretim ol yet long traime makim wanpela de olsem komyuniti de. Dispela de em ol i mas makim long traime mekim ol projek olsem long kiinim rot na bris.

"Rot, bris na bris bilong sip na tu ol haus em i bikpela mani tru long wokim. Olsem olgeta wanwan man na meri i mas mekim wok bilong ol long traime lukautim ol dispela samting i kam long gavman," Zeming i tokim ol pipel i bung long Gauru viles long harim memba i toktok.

Em i askim ol lida tu long ples long maskim tingting long pilai politiks na wok wantaim em long bringim sevis i go long ol pipel.

Minista i tok olsem Siassi i gat planti samting stret em i gen helpim o sapatim Morobe na tu kantri, PNG, tasol ol pipel i mas stap long noken larim gavman i mekim olgeta samting bilong ol.

Em i tok ol pipel i mas stat long wok long graun bilong ol na tu kamapim ol selp help projek na makim long gavman i wokim samting bilong ol

"Papua Niugini i gat planti ol risoses na i gat planti ol pipel i ken mekim wok long helpim ol yet na tu ol arapela pipel. Taim nau i hat olsem olgeta man i mas wok wantaim bikos sapos mipela i no wok, nogat man bai mekim wok bilong mipela," Zeming i tok.

Morobe kisim K47 milien long nesenel baset

YAKAM KELO i raitim

MOROBE Provins i kisim K47 milien insait long nesenel baset bilong yia 2000 we nesenel palamen i pasim long dispela wik.

Dispela baset em i antap liklik long baset bilong dispela yia we nesenel gavman i givim. 1999 nesenel baset bilong provins long dispela yia em K42.6 milien.

Tasol long skelim bilong baset buk, 1998 i bin narakain long 1999 na baset bilong neks yia. Morobe provins i bin kisim K52 milien long 1998 taim Gavman bilong Bill Skate i bin stap long pawa.

Totol baset bilong Morobe long dispela yia i bin moa long K70 milien bikos narapela K30 milien i bin kam long sels takis bilong provins yet we em

i save pulim long ol bisnis na kampani long provins. Tasol nau dispela i nogat moa bikos nupela lo bilong Velu Eded Takis (VAT), i kamap na nesenel gavman i go pas long kirim ol takis na em bai skelim gen long ol provins wanwan.

Morobe Gavana Luther Wenge i bin tokaut long taim bilong pasim baset dispela wik olsem em i sapatim dispela baset bilong Gavman tasol em i laikim olsem moa mani i mas go insait long wok bilong agrikalsa. Bikos long agrikalsa, bai ol manmeri i ken mekim wok ol yet na i gat mani long poket bilong lukautim ol hevi na ol samting ol i laikim.

Mista Wenge i tokaut tu olsem wok agrikalsa tu i ken kirapim moa bisnis na developmen bilong kantri long bihain taim na inap lukautim ol pipel

na kantri wantaim i go long-pela rot moa. Olsem na Gavman i mas sanapim tingting na lukluk bilong em i go stret long wok bilong agrikalsa taim em i laik kamapim kain baset bilong kantri olsem.

Totol baset mani bilong Morobe provins long yia 2000 i sanap olsem K47,077,300.

Ol skul tisa insait long provins i gat nem long K23.8 milien na holidé oliv pe bilong ol i sanap olsem K163,000. Mani bilong wokim ol rot, bris, wof na ples balus i sanap olsem K6.9 milien, ol lokol level gavman kaunsil i sanap olsem K2.8 milien, ol sios nett sevis i kisim K1.5 milien, edukesen sabsidi bilong Morobe provins i kisim K1.68 milien, Edministresen kes olsem K3.9 milien na stat grent i olsem K7.6 milien.

VAT salens bilong Wenge i stap yet

MOROBE Gavana Luther Wenge i askim Gavman long noken makim ol lain husat i bin kamapim Velu Eded Takis (VAT) insait long dispela Spesel Task Fos bilong glasim gen ol takis bilong VAT.


Mista Wenge i kolim ol nem olsem Intenel Revenu Komisina David Sode, Mike Manning na ol arapela lain moa husat i bin kamapim dispela VAT lo.

Mista Wenge i tok em i laikim lida bilong dispela grup Sir Nagora Bogan wantaim ol lain bilong em i mas ol independen lain long glasim gen ol lo bilong takis na mekim wanpela independen ripot stret.

Gavna Wenge i mekim dispela toktok bihain long pait bilong em long stapim VAT insait long kantri. Em i bin mekim planti bikpela kempen raun long Papua Niugini long kisim sapat bilong ol manmeri long egensim dispela takis lo.

Long palamen las wik em i kamapim dispela toktok long palamen tasol Praim Minista Sir Mekere Morauta i tok Gavman i kamapim pinis dispela Spesel Task Fos long glasim olgeta lo na wok bilong takis insait long kantri. Na dispela grup bai kamapim ripot long wok painimaut bilong ol we ol bai givim long palamen long taim palamen i bung gen long neks yia 2000. Na dispela ripot i ken tokaut long wanem eksen gavman i mas mekim long ol lo na wok bilong takis insait long kantri.

Gavana Wenge i laik kamapim wanpela petisen long dispela VAT takis tasol palamen i kamap wantaim dispela toktok we em i larim na lukluk long dispela grup bilong Sir Nagora



• Luther Wenge.

Bogan i pinisim wok bilong ol pastaim.

Mista Wenge i tok em i laikim bai dispela grup i mas kisim tingting tru bilong olgeta lain long sait bilong liklik bisnis, bikpela bisnis na ol grasrut tu wantaim long skelim hevi bilong olgeta lain wantaim long dispela VAT takis taim ol i laik kamapim ripot bilong ol.

Insait long nesenel baset, Gavman i lukim olsem VAT takis bai wanpela bikpela rot bilong kamapim mani na bikpela hap bai i go bek long ol provins. Long olgeta mun bai ol provinsal gavman i kisim takis bilong VAT.

Dispela VAT i kamap na stapim ol provinsal gavman tu long i no ken kisim moa ol provinsal sels takis we ol i save oltaim kisim bipo long provins bilong ol wanwan.



Mipela i laik toksave long ol kastoma bilong mipela na tu ol produsa, ol baiya na ol siping kampani bilong mipela lsem Het Opis bilong Kopra Marketing Bod long Pot Mosbi bai i pas long belo long Fraide December 10 na bai i op ken long Mande long wik bihain.

Brans opis bilong CMB long Pot Mosbi bai i op yet inap ong 4:06 long Fraide apinun long kisim kopra i kam long ol produsa bilong mipela long Sentral na Galf Provins.

Mipela nau i laik tok Meri Krismas na Hepi Niu Yia i go long Minista bilong Agriculture na Livestock, ol woklain na femili bilong em; ol produsa na baiya bilong mipela, ol lain siping kampani bilong mipela; na tu long Dipatmen bilong Agriculture na Livestock; ol loya na ol akaunten bilong mipela; ol memba bilong CMB Bod, ol manesmen na wokmanmeri bilong CMB na ol liklik CMB kampani wantaim ol femili bilong ol.

God Blesim yumi olgeta.

Michael Varapik,

General Manager Commercial Services.

Planti pret long Y2K na lusim Mosbi

MATHIAS MALE i raitim

Planti pipel i harim olsem yia 2000 bai ol kompyuta bai stop wok na planti sistem bai bagarap olsem na ol i stat lusim Mosbi na go bek long wanwan provins bilong ol.

Long bihain dispela tingting, Wantok i bungim planti ol manmeri husat ol i stori long dispela Y2K milinium bak we ol kompyuta bai i gat hevi na ol i stat salim ol samting bilong ol long liklik prais na ol i laik go bek long ples bilong ol.

Wanpela meri Ruth Kepa bilong Hagen i tokim Wantok olsem em i salim haus na ka bilong em long liklik prais tasol bikos em i laik go stap long ples pastaim na larim yia 2000 kam bihain. Em i tok sapos em wantaim famili bilong em stap hia long Mosbi na tru tru, kompyuta bagarap em les long painim taim long kamapim sindaun na em laik tru long go long ples na stap. Bikos ples em ol kaikai na wara i isi na fri na nogat wanpela pawo o kompyuta i kontrolim.

Narapela man tu, Mista Tigelu Walefu bilong Goroka i tok, em i bilip na save olsem ol bikipela kompani olsem Eda Ranu, Air Niugini, Elcom na Telikom na ol sampela ol biknem benk ol i redi pinis long dispela kompyuta hevi na sapos tru dispela hevi i kamap, ol dispela kampani i redi na orait long operetim bisnis bilong ol.

Tasol em laik go long ples na

laik stap wantaim ol famili bikos em i pret nogut ol kompyuta i dai olgeta na maski ol i rere na sambai tasol em i pret nogut ol kompyuta i blekaut olgeta long yia 2000 stret. Long dispela asting em laik go long ples na stap pastaim na yia 2000 ken kam bihain, Mista Walefu i tok.

Long dispela tingting yet planti stori we Wantok i kisim long em ol i mekim wankain toktok tasol long Y2K 2000 milinium na planti ol pipel long 9 Mail, Morata, 8 Mail ol i salim ol haus na ol samting bilong ol long liklik prais na planti ol i lusim Mosbi pinis.

Astingting we i mekim ol pret long lusim Mosbi em ol i harim olsem ol kompyuta bai i gat hevi na yia 2000 i kam klostu olsem na long dispela as tasol ol i lusim Mosbi.

Tasol planti bikipela gavman opis olsem Telikom, ol lain bilong lukautim telefon, Elcom ol lain bilong lukautim pawa, Eda Ranu ol lain bilong lukautim wara saplai long Mosbi, PNGBC beng wantaim ol arapela komesel beng ol haus mani, Nesenel Providen Fan (NPF) na planti arapela gavman opis na kampani i stretim ol kompyuta mesin bilong ol pinis long abrusim dispela hevi. I gat wanpela bikipela kempen bilong gavman (Y2K Komiti) i wok long go het long skulim ol manmeri olsem bai ol dispela samting i no inap bagarapim planti sevis na sistem bilong gavman long kantri.

Azzimbah bai pairap long yia 2000

YAKAM KELO i raitim

OL boi nogut bilong Azzimbah ben i redi long mekim nais long nu yia wantaim nupela kaset ol i katim wantaim Chin H Min studio long Mosbi. Dispela nupela kaset bai kamaut long nupela yia, yia 2000 na inap kukim tru laik na interes bilong planti musik manmeri insait long kantri.

Azzimbah i lusim pinis Pacific Gold studio na nau ol i stap wantaim Chin H Min studio long katim kaset bilong ol.

Ben lida Tamarua Tanora Sepa i tok ol boi i sanap strong yet long go het wantaim moa musik bilong Azzimbah na ol bai strong yet long holim stail na musik bilong Azzimbah i go het yet insait long kantri.

Tamarua i tokaut olsem Azzimbah ben i gat 10-pela nupela song we i gat stail na kik na inap kukim tru planti musik manmeri bilong PNG. Tupela bikipela song Azzimbah i rekotim na i gat bilip olsem tupela song ya bai i kik moa yet em 'Sweet Home'. Dispela song em long naispela na switpela ples Daru long Westen provins we Azzimbah i bin go mekim wanpela raun bilong ol long hap dispela yia. Na ol i laik salim dispela song olsem memori song i go long ol pipel bilong Daru.

Narapela song we i gat kik tu em 'Waiks'. Dispela song i singsing long kain pasin na raun bilong ol yangpela manki insait long kantri. Waiks em nem bilong wanpela bikipela bas stop long Gerehu stes 6 we olgeta taim ol manmeri i save go sanap wetim bas long go long wok o long taun.

Tamarua i tok song ya i singsing



• Tupela memba bilong Azzimba ben.



Azzimbah Martin Rawali i bin bruk lusim ol boi bilong ben na i go mekim solo bilong em yet. Martin i stap yet wantaim Pacific Gold Studio na ol poroman bilong em i go askim Chin H Min na kisim tok orait long katim kaset wantaim ol.

Ol boi bilong Azzimbah i wok strong long holim yet nem bilong ben na mekim ben i ron strong na holim yet stail bilong Azzimbah we planti manmeri i save feveret long harim ol.

Tamarua i laik mekim bikipela tok amamas bilong Azzimbah ben i go long ol dispela lain husat i bin sapotim ol gut tru na strongim ol

long sanap strong na go het yet long pilai na holim nem bilong Azzimbah i go yet. Ol dispela lain em; Leke famili, Guaba famili, Paska famili na ol famili na gutpela pren long Gerehu Stet 6.

Bikipela tok tenkyu tu i go long Raymond Chin long tok orait long ol boi Azzimbah i ken go rekot wantaim Chin H Min studio. Bikipela tok tenkyu tu i go long Thomas Lulungan na George Luff bilong Chin H Min studio long wok klostu wantaim ol.

Tamarua i laik mekim bikipela tok amamas tu i go long Martin Brash long gutpela toktok sapot bilong em long ol i mas pilai strong na stap wantaim gut long karim nem bilong Azzimbah ben i go moa yet insait long Papua Niugini musik indastri.

Olsem na husat manmeri i save laikim tru long harim ol musik bilong Azzimbah, no ken tubel bikos neks yia insait long nupela milenum, bai yu harim narapela kaset bilong Azzimbah na dispela taim bai ol kain kain stail na switpela musik bilong PNG stret bai kamap long amamasim yu, Tamarua i tok.


long olgeta de taim ol wokman i go long Waiks bas stop, ol pasindia manki bilong haus tu i save giarnan go sanap long bas stop tu olsem ol wokman. Tasol ol i no go long wok, ol i go raun nating long taun na kam bek long apinun na ol manmeri bai ting ol i go tru long wok na pinis wok na i kam long haus long apinun.

Ol song bilong Azzimbah i stap long tok Pisin, Motu na tu long tok ples Oro. Ol i miksim tru ol musik bilong ol bai i ken krau stret long laik na tingting bilong ol manmeri bilong Papua Niugini.

Olsem yumi ken save, taim Azzimbah i kamap las yia, em i kukim tru PNG we sampela feveret song yu ken tingim em, Smel tin pis, Azzimbah na arapela moa.

Ol dispela stail manki bilong Gerehu husat i save pilai long Azzimbah em Tixie Toua Sepa (vocals), Guba Tom (vocals/keyboards), Thomas Paska (Vocals), Daniel Sepa (bass guitar/vocals), Michel Samei (drums) na Tamarua Sepa yet olsem ben lida.

Long dispela yia lid singa bilong



WANTOK

NEW ADVERTISING RATES effective 1st January, 2000

Display Advertising Space. (Casual) Cost. K3.55 per column cm.

| Advert Space | Size | Mono K | 1 Colour K | 2 Colour K | Full Colour K |
|--------------|------|--------|------------|------------|---------------|
| Full Page | 38x7 | 944.30 | 1,194.30 | 1,444.30 | 1,944.30 |
| Half Page | 28x5 | 497.00 | 747.00 | 997.00 | 1,497.00 |
| Half Page | 19x7 | 472.15 | 722.15 | 972.15 | 1,472.15 |
| 1/4 Page | 19x4 | 269.80 | 519.80 | 769.80 | 1,269.80 |

WANTOK Classifieds Rate - K3.85 per column cm

* All prices quoted do not include 10% VAT.

Compare the Wantok's costs, K3.55 per c/cm against the dailies K6.52 for the same size.

DISCOUNT RATES FOR VOLUME USAGE ARE AVAILABLE ON REQUEST

Miting lukluk long hevi bilong helt sistem

JOHN KEWA i raitim

"Wok bung wantaim long stretim rot bilong ol bikipela helt sevis". Dispela i kamap olsem bikipela as tingting bilong wanpela semina bilong ol pablik helt bod na provinsel helt bod long Mosabi long Novemba 28 i go long Disemba 3, 1999.

Praim Minista Sir Mekere Morauta i bin go pas long singautim dispela bung bilong ol lain bikmanmeri bilong helt.

Bikipela tingting bilong dispela bung em long glasim gut helt sistem bilong kantri na long sem taim bungim tingting long painim sampela gutpela rot long stretim ol kain hevi na wari we helt sistem i bungim tude.

Foapela bikipela tingting we ol i bin glasim long semina em, We bilong lukautim ol Provinsel Helt Sistem, Glasim wanem kain strong ol provins na ol bikipela haus sik i gat long bringim ol helt sevis i go long ol pipel, Strongim pasin bilong wok bung wantaim long bringim ol helt sevis long ol pipel, na Glasim we bilong givim mani i go long helpim ol helt wok.

Wanem ol samting i kamaut long dispela semina em ol i bin putim wantaim long wanpela posisen pepa na givim i go long Praim Minista long skelim gut na mekim sampela gutpela disisen.

Vais Minista bilong Helt Mista Ludger Mond husat i pasim dispela semina long Fonde i tok em i amamas olsem dispela semina i kamap gutpela tru.

Mista Mond i tok long ol bikmanmeri bilong helt olsem ol i holim bikipela wok tru bilong helt sistem bilong kantri. Olsem na em i tok sapos yumi no gat ol kain lida na wokmanmeri bilong helt bai ol narapela kain kain wok bilong yumi i nonap go longwe.

Mista Mond i tok em i amamas tru long ol bikmanmeri bilong helt i givim taim bilong ol long kam bung na bungim tingting wantaim long luksave long ol hevi na wari bilong helt sistem bilong kantri. Em i mekim tok amamas i go long Sir Mekere long kisim dispela tingting long singautim dispela semina.

Mista Mond i tok em i bilip olsem nau yumi i go klostu long lukautim gut helt bilong ol manmeri bilong kantri. Em i tok dispela i kamap klia long wanem ol manmeri husat i go pas long helt wok i soim olsem ol i laik wok hat long tingim ol pipel bilong yumi. Em i tok ol lida i bin givim taim bilong ol long kamap long dispela semina em wanpela gutpela sain bilong wok strong na wok bung wantaim.

Mista Mond i tok tu olsem yia 2000 baset we Sir Mekere i kamapim em wanpela namba wan baset tru na helt sekta i bin kisim moa mani long dispela baset. Em i tok dispela i sain olsem mipela i stap long gutpela rot nau long lukautim helt bilong olgeta pipel long kantri.

Nau yet, i gat foapela provins tasol i bin kamapim pinis provinsel helt bod bilong ol. Dispela ol provins em Wes Nu Briten, Westen Hailens, Oro na Sandaun Provins.

Helt bod bilong ol narapela provins em Minista i bin oraitim pinis na i redi long sainim long pinis bilong yia.

Narapela 6-pela provins em Sauten Hailens, Sentrel, NCD, Morobe, Madang na Not Solomon's Provins i no givim yet nominesin bilong ol i go long ol eksekutiv bilong ol long sainim.

Mista Mond i mekim tok askim i go long ol provinsel edministrata olsem ol i mas luksave olsem ol provinsel helt bod i mas kamap bai ol helt lo i ken wok gut.

Gavman bai sapotim hevi bilong ol woa lain

PNG Asosiesen bilong Redress bai kisim toksave bilong dispela Gavman bilong Praim Minista Sir Mekere Morauta long namba wan mun bilong yia 2000 long hevi bilong ol na famili bilong ol long taim bilong wol woa 2.

Minista bilong Stet na i save helpim Praim Minista lairo Lasaro i tokim Wantok olsem em i bin karim dispela hevi bilong ol turangu lain bilong wol woa 2 i go tokim Praim Minista Sir Mekere pinis na em i wanbel tru long sapotim dispela toktok bai Gavman bilong Japan i ken lukluk long hevi bilong ol PNG lain bilong woa.

Mista Lasaro i tok Praim Minista i lukim dispela hevi olsem wanpela bikpela samting na em i laikim ol wok na rot bilong dispela samting i mas kamap gut inap long toktok tru wantaim ol lain bilong harim dispela hevi i kamap.

Mista Lasaro i tok Praim Minista Sir Mekere i tok taim olgeta hevi na wok bilong yia 2000 nesenel baset i pinis gut, orait ol i ken sindaun gut na go insait long dispela toktok na lukluk long wok bilong kirapim toktok.

Mista Lasaro i tok em i luksave olsem Praim Minista Sir Mekere Morauta i gat bikpela sapot long dispela hevi bilong ol lain long woa long kamap wantaim rot bilong stretim toktok wantaim ol lain bilong Japan Gavman.

Ol toktok bilong stretim wantaim Japan Gavman na PNG Gavman i mas kamap bikos long dispela rot tasol bai eksen i ken kamap long stretim ol turangu lapun na ol lain i kisim bagarap long woa wol 2 long han bilong ol Japan ami.

Lain bilong katim gutnius raun long Kerema

JOE KANEKANE i raitim

WANPELA grup husat i save katim gutnius long wanwan tokples bilong kantri i stap nau long Kerema bai ol i larim ol pipel long dispela hap long harim na glasim ol piksa buk long tok ples bilong ol.

Dispela lain ol i kolim ol yet Language Recording Inc i save go pas long katim ol gutnius long planti hap bilong kantri na dispela raun bilong ol em long surukim wok bilong ol.

Ol lain husat i stap long dispela grup em sampela ol yut lain long Sidney Australia and sampela wokman bilong dispela grup husat i save stap long PNG.

Ol bai wokabaut long 52 ol ples long Kikori na Baimuru na ol bai kisim tupela wik long wokim dispela wok.

Mausman bilong dispela grup ALex

Shaw i tok dispela wokabaut progrem bilong ol i kamap long yia 1993 we i save lukim ol wokman i go long pipel long ples na yusim dispela ol tape long surukim tok bilong God.

Em i tok bikpela tingting bilong ol em long halivim dispela ol lain husat i no rit na rait long kam klostu long God taim ol i harim ol stori long tok ples bilong ol yet.

"Mipela i painim aut olsem dispela wok i save halivim planti ol pipel tru long wanem i gat sampela i no save long rit na rait na dispela em i wanpela bikpela rot long harim tok bilong gut," em i tok.

Em i tok ol bai givim sampela piksa buk wantaim posta we ol lain i ken lukim taim ol i harim gutnius long tok ples bilong ol.

Ol yut husat i stap long dispela progrem i tok ol tu i amamas long stap go na stap wantaim ol pipel long dispela ol kain hap.

Ol voluntia luksave long de

BARBARA MASIKE i raitim

OL VOLUNTIA lain insait long sampela hap bilong Papua Niugini i bung na kamapim ol sampela wok voluntia long Fraide, Sande na Mande Desemba 3, 5 na 6 long makim Intanesenel voluntia de.

Yunaited Nesens yet i bin makim Intanesenel voluntia de long Desemba 5 long wanwan yia.

Insait long Lae siti ol ovasis na nesenel voluntia wantaim i bung wantaim ol sampela yut na sios grup long wanpela voluntia wok long klinim ol hap bilong Lae siti.

Dispela wok em i wanpela samting em Lae siti atoriti yet i bin

kamapim long mekim ol pipel i helpim long lukautim Lae siti.

Ol lain husat bai kamap long dispela wok i kamap long Fraide Desemba 3 long Lae siti atoriti yet.

Long Goroka bai gat ol sampela samting olsem:

- Ol disple na drama we ol lain Amerika voluntia Steve na Barbara Arnest husat i wok long Institut bilong medikel rises bai mekim long sik HIV/AIDS.

- Narapela Amerika voluntia Allison Irland bai putim wanpela awenes disple i soim ol toksave bilong Bihute kalabus;

- Wanpela Siapan voluntia Makoto Inoue bai mekim sampela stail kuk bilong ol Siapan yet long Goroka haikul.

- Wanpela non gavman oganaisesen bai soim ol wit we i kamap long Papua Niugini stret, na

- Wanpela Jeman voluntia Bruno Hanke bai soim ol we bilong mekim jem na bekim bret, dispela man i save stap long Kamaliki vokesinel treining senta.

Long Mosbi yet ol samting bai kamap long dispela de em long;

- Wanpela radio progrem wantaim ol sampela lain voluntia bai kamap long Fraide Desemba 3 long NBC Karai sevis.

- Long Sande Desemba 5, sampela lain voluntia bai helpim long penim

opis bilong Nesenel voluntia sevis long Boroko. Wanpela grup bai stat long 10 kilok long moning na narapela grup bai stat long 2 kilok apunin na pinis long 4 kilok na.

- Long mande Desemba 1 bai i gat narapela radio progrem long Kalang sevis, sampela voluntia lain bai kamap long dispela progrem.

Long mande yet bai i gat wanpela lanseon long makim dispela de. Deputi praime minista John Pundari bai kamap long givim toktok long dispela de.

Ol man husat i wok olsem voluntia na i wok insait long ol grup husat i salim ol voluntia bai kamap long dispela lais.

Ol voluntia em ol lain husat i givim taim bilong ol nating long mekim wok bilong helpim ol narapela long mekim sindaun bilong ol i kamap gut.

I gat planti voluntia insait long Papua Niugini husat i kam long ol narapela kantri na tu ol lain bilong Papua Niugini stret.

eksekyutiv dairekta bilong Nesenel voluntia sevis Joseph Ogaie long dispela wik yet i askim olgeta pipel insait long ol hap ol i stap long makim dispela de wantaim pasin bilong helpim wanpela narapela.

Em i tok olgeta lain husat i save helpim long klinim ples em ol tu i mekim voluntia wok.

"Pasin bilong makim dispela de em long luksave long ol lain husat i save wok long helpim ol narapela insait long ples na ol i no save tingting long kisim pe tumas." Mista Ogaie i tok.

ELA MOTORS HANKOOK TYRES

Planti stail long ol kualiti Hankook tyres long fitim ol kain kain kar na trak

Kisim ol long Ela Motors Pats dipatman na ol Tyre senta long olgeta hap.

HANKOOK
TYRES

KOLIM MIPELA NAU!

RT01
HANKOOK
TYRE

884
HANKOOK
TYRE

Z36
HANKOOK
TYRE

827
STEEL
RADIAL

Ela Motors
LONG OLGETA HAP

HEAD OFFICE PH 3229614 PORT MORESBY 3229414 LAE 4722322 KOKOPO 9829100 RABAU 9821988 MADANG 8522188 GOROKA 7321844
MT HAGEN 5421888 WEWAK 8562255 KAVIENG 9842788 KIMBE 9835155 TABUBIL 5489060 VANIMO 8571254
PORGERA 5479367 KUTUBU 5496685 BUKA 9739017 LIHIR 9864099 ALOTAU 6410100

Koiari kaunsil bai sasim takis long Kokoda trail

KENNEDY EDENE i raitim

Koiari lokol level gavman kaunsel (KLLGC) insait long Sentral provins bai kamapim takis fi long ol trekas husat i laik wokabaut long Kokoda Trail.

Dispela tok em presiden bilong KLLGC James Vovoi Selu bin mekim.

Em i tok planti yia i go pinis nau planti ol kampani na ol man i save yusim trek ol i no save baim takis long KLLGC.

Ol save yusim nating nating na wokabaut long laik bilong ol.

Ol lain ol i save yusim dispela trek em ol lokol turist, ovasis turist, yut grups, sios grups, tua grups na sampela ausait lain.

Koiari LLGC presiden Mista Selu, husat em kaunsel bilong Kagi, long Maunt Koiari long Kokoda Trail i tok, dispela trek em, trek bilong ol Koiari asples we ol papa na tumbuna bilong mipela bin givim taim bilong ol na pait wantaim ol Japan long wantaim Australia na Amerika ami long taim bilong woa.

Dispela trek em tok save long mipela long hatwok bilong mipela long dispela taim na i kam i nap nau.

Na tu planti bilong ol kago boi bilong Koiari ol i bin stap long dispela taim ol i no kisim sampela mak mak bilong ol olsem Kompensesen.

Em i tok, ol KLLGC bai ino inap isi o marimari long husat. Ol bai sasim takis taim kaunsel sindaun long namba tri asembli miting bilong ol long dispela mun.

4-pela sek-poin bai ol putim long trail we bai ol i sekim ol man.

Kaunsel tok, ol bai sekim na lukim olsem ol man i wokabaut long trek mas i gat pas we em i tok orait long wokabaut.

Dispela em bilong sekim gut man i yusim trek.

Dispela 4-pela sek poin em bai long Kagi patrol post, Efogi viles, Manari na Naoro viles insait long Maunt Koiari eria.

Ol pis opisa bilong ples bai helpim long dispela wok long olgeta sek poin.

Man husat em nogat pas bai ol i kisim sas.

Dispela bai ol i kamapim long ol turist husat bai flai i go long Kagi, Efogi, Manari na Myola.

Mista Selu tok, dispela em long wokim mani bilong kaunsel long pulim intenel reveniu bilong kaunsil.

Mista Selu bin tokaut long Turist Promosen Atoriti (TPA) na Nesenel Kalsa Komisen (NCC) na ol sampela ol oganasesen husat i save yusim Kokoda Trail.

Em i tok, bai Koiari LLGC bai tok save long Kokoda LLGC long wanem samting bai ol i wokim.

Na tu, dispela em bikpela samting lng lukim olsem dispela trek nogat man nogut i yusim long haitim na karim ol ol spak brus o mariwana i go kam long en. Na tu sekim ol raskol noken yusim olsem ronawe rot long Mosbi na Sentrel provins o long Morobe na Oro provins.

Sogeri eria tingim Wol AIDS De

Taim olgeta hap bilong wol i wok long tingim Wol AIDS De long Desemba 1, Sogeri insait long Sentral provins tu i makim dispela AIDS awenes program bilong ol.

Dispela AIDS awenes program ol holim em namba wan taim long kamap long Sogeri eria.

Program em larowari provinsel hai skul bin go pas long kamapim na planti pipel ol i bin go lukim i tok em i gutpela tru.

Program em Sentral provinsel AIDS komiti we dairekta bilong Sentral provinsel AIDS sekretari-et Mista Leo Miria na lain bilong em bin ronim.

Tingting bilong ronim dispela program em long kirapim AIDS program o wok insait long Sogeri na Koiari eria.

Mista Miria bin tingting long statim pastaim long edukesen

institut olsem pat long skul wok na awenes na tu olsem planti ol yangpela olsem 14 i go long 30 krismas em i mas kisim save long en.

Long dispela taim Sentral provinsel edministreta Dokta Sibona Kopi bin kam.

Dokta Kopi tok, dispela sik em i no wari long sait bilong marasin tasol em i wari bilong komyuniti na developmen na laikim olgeta lain insait long Sentral provins long mekim moa wok kempen awenes insait long olgeta komyuniti.

Bikman bilong Koiari lokol gavman kaunsil presiden Vovoi Selu em tok hamamas long Sentral provins AIDS komyuniti long taim bilong ol na wok bilong ol kisim dispela program insait long kaunsel eria bilong em.

Em i tok hamamas long larowari hai skul tu long hostim dispela program.

Em i tok, yes em i namba wan taim tasol laikim CP AIDs komyuniti long karim aut moa wok awenes long skulim o lainim ol komyuniti long olgeta hap bilong Sentral provins.

Em i tok, mani em i gat wari tasol ol mas wok strong yet long wokim awenes wok.

Mista Sela tok, strong long ol papamama, na tisa long advaisim na lainim ol pikinini long nogut bilong sik AIDS na tu long ol arapela nogut pasin olsem kisim drags, dring bia, mekim pasin bikhet na raskol nabaut.

Dispela program em ol skul olsem Laloki hai skul, Yobuna praimer, Sogeri praimer na lariawari bin kamap witnesim.

Koiari kaunsil i laik go pas long ol hevi

Ol oganasesen olsem ol gavman dipatmen, non gavman ejensis (NGO) na ol dona ejensis em Koiari lokol level gavman kaunsel (KLLGC) singautim ol long toktok stret wantaim ol long ol wok na hevi bilong ol.

Presiden bilong Koiari lokol level gavman kaunsil. Vovoi Selu i mekim dispela tok bihain long planti yia i go pinis ol man, gavman na ol praiwet kampani save gaimanim ol papagraun na yusim nating nating risos bilong ol.

Tu Mista Selu tokim ol kaunsela bilong em long tokim ol pipel

long ol rot na we bilong komyunikesen aninit long dispela gavman rifom.

Em tok, taim KLLGC i no bin sanap, planti pipel na ol man ausait bin yusim nem bilong Koiari nating nating na kisim amamas bilong ol yet.

Na ol papagraun na pipel ol kisim taim o no save kisim helpim.

Em tok, dispela ol man na ol kampani save sanap na yusim nem bilong Koiari na mekim wok bilong kaunsel tasol lo i no luk-save long ol aninit long rifom gavman.

Em tok, Koiari LLGC em tasol lo bodi insait long eria na wanem toktok o hevi bilong pipel i mas kam stret long kaunsil.

Olsem na Mista Selu singaut i go long ol pipel na ol ovasis lain husat save givim helpim na sapot o givim kinkain toktok o samting bilong Koiari pipel long eria mas kam stret pastaim long Koiari Lokol Gavman Kaunsil pastaim.

Nau yet Koiari LLGC tingting bai ol i opim toktok wantaim Kokoda LLGC we bai ol i mekim wanpela agrimen na wok wantaim long developim Kokoda Trail.

The SMASH REPAIR CENTRE has MOVED

a division of steamships automotive

re-LOCATION
LAE

WE ARE HERE

The SMASH REPAIR CENTRE
Sect: 23 Lot: 10

The LARGEST
& best-EQUIPPED
SMASH REPAIR FACILITY
In PNG.

- *SPRAY PAINTING
- *SMASH REPAIRS
- *METAL FABRICATION
- *TRUCK SPECIALISTS

- *24 hour TOWING SERVICE

ph: 472 3477
fax: 472 0463



FEDARE SIN BILONG SEVINGS NA LONS SOSAITI - 2000 NA BIHAIN

SAPLIMEN BILONG WORD PUBLISHING



• Ol lain husat i bin go long 1999 Asia Credit Union Forum.

Fedaresin bilong Sevings na Lons Sosaiti - 2000 na go mo yet

BOD siaman bilong Fedaresin ov Sevings na Lons Sosaitis, Michael Koisen i singaut long olgeta memba long wok bung wantem long mekim long strongim wok bilong o fainensel institusen insiat long kantri long yia 2000 na ol arapela yai bihain.

Mista Koisen i tok nau ol i makim ol intarim bod ov dairektas long lukautim wok bilong FESALOS, em i taim bilong developim wanpela fainenseli strongpela na gutpela muvmen.

Tasol em i tok tu olsem dispela i nidim hat wok bilong olgeta man.

"Dispela em i tru stret long nau PNG is wok lukim dispela bikos ol risos i no planti na ol seavings na lons muvmen i wok long kisim taim," Mista Koisen i tok.

Em i tok olsem wok bilong mekim dispela i bin stat 10 yia i go pinis long wanpela rivaitelais-esin program.

"Maski olgeta hat wok i wok long go long ol sot tem wok we bai lukautim ol wari ol i wok long mekim long wanpela wei bai i nap sanap strong long halivim developmen long bihain taim," Mista Koi i tok.

I gat wanpela longpela stretegi o plen long developim wanpela strongpela seavings na lons sosaiti insait long PNG. Dispela plen i gat 8-pela objektiv o ol gols bilong em:

- Long impruvim wok bilong Fedaresin ov Sevings na Lons Sosaiti we em bai ken mekim ol wok bilong em gut kain olsem long provaidim teknikal sapot na promosen sapot i go long ol institusen bilong ol seavings na lons sosaiti insait long PNG.

- Long bungim ol seavings na lons sistem wantem developmen

bilong ol sosaiti husat i gat gutpela sans long halivim ol man meri na long mekim mani, long jonim we i no wok long wok tumas wantem ol arapela sosaiti.

- Long stretim pefomens na wok bilong ol seavings na lons sosaiti wantem ol impruvmen long ol oparesin bilong ol olsem ol akaunts bilong ol, apdetim ol polisi bilong ol na ol arapela samting we bai ken halivim long apim ol invesmen bilong ol memba.

- Long disainjim na putim wanpela sistem we bai ken monitarim ol was long ol muvmen bilong ol seavings na lons sosaiti long kantri.

- Long ekspendim o apim membasip wantem ol promosen bilong ol nupela sosaiti na long apim ol membasip bilong ol sosaiti i stap pinis.

- Long developim wanpela sentrol inta-lending fasiliti insait long FESALOS long sapotim ol seavings na lons sosaiti long provaidim gutpela sevis long ol membas bilong ol.

- Long strongim na mekim bikpela ol projekt we i save bringim mani i kam insait, na

- Long sapotim ol meri long wok bilong ol na halivim ol long developim ol long kamap ol lida insait long ol sosaiti.

Mista Koisen i stok ol nesanel asosiasen we i save sapotim ol man na i save kisim gutpela sapot long ol arapela sosaitis i ken mekim ol gutpela wok bihain taim kain olsem impruvim ol laif bilong ol membas bilong ol wantem ol femli bilong ol, ol komuniti na ekonomi bilong kantri.

Mista Koisen i sigaut long ol memba bilong ol long tingim gut

olsem difarens bilong ol wantem ol narapela fainensel instatusen em , ol seavings na lons i save sanap long ol pipol na ol arapela i save stap wantem mani tasol.

Em i tok olsem sapos yumi yusim dispela fomula na sapos yu CEO yu bai pilim olsem yu no wok long bihainim dispela ting ting yu mas senis nau.

Em i tok olsem nau em i taim

mekim skelim yumi yet.

Ol intarem membas bilong ol Bod ov Dairektas bilong PNG Federation of Savings and Loans Societies em: Michael Koisen (Siaman), Sir Alkan Tololo (deputy siaman), Kiddy Keko, Joe Tsikula, Raymond Maisu, Steve Tupa, Andrew Imaroto na Otto Salamang (Bank of PNG representativs).

Plen bilong divelopim ol sosaiti

Ol salens bilong ol kredit union long 2000 na bihain

EM i bin wanpela bikpela salens stret long kisim bek konfidens bilong ol pipol long mekim ol i bilip olsem ol lons sosaiti i ken halivim ol, Gavana bilong Bank bilong Papua Niugini, Wilson Kamit i tok.

Mista kamit i tok olsem hamas pela yia i wok long nau ol pipol i stat long bilip.

I gat olsem 99 registad sosaiti insait long PNG tasol 25 tasol i wok long oparet.

Mista Kamit is tok olsem wanpela rison wai ol man i wok long stat long bilip em bikos ol provins i wok long stat setim ap ol seavings na lons sosaiti bilong ol.

Em i salensim ol laim bilong em yet long stap wantem dispela grot na em i sigaut i go long sosaitis insait long kantri long luk luk long ol dispela samting.

- Hoa ol i ken soim olsem olsem i gat maket bilong ol long kamap olsem ol fainensel namel

man long long givim ol man meri bilong Papua Niugini sans long tek pat long ekonomik developmen bilong kantri.

- Wanen ol stretiji o ol wei ol menija na ol dairekta bilong ol sosaitis i ken mekim long mek so olsem ol i stap strong na long seving gut ol memba bilong ol.

- I gat nid bilong ol bos bilong ol sosaiti long ol i stap onest na mekim gut ol wok bilong ol

- I gat bid bilong ol gutpela polisi o wei olgeta man meri i ken bihainim.

- I gat nid tu long wanpela gutpela na rilaiabel akaunting na buk kiping sistem we i ken stap gut olgeta taim.

Mista Kamit i tok olsem em bai no nap long tokim ol man olsem em i save long olgeta ansa bilong olgeta wari na salens bilong ol seving na lons sosaitis.

Em i tok olsem ol man meri

husat i lukautim ol seving na lons sosaiti i mas luksave long ol wari na ol salens bilong ol kredit union bihain long yia 2000. Em i tok olsem ol i mas yusim save bilong ol na long ekspirians bilong ol long halvim Sentrol Bank.

Mista kamit i tok olsem tok tok bilong Wel kredit Union Dei, em i bin " Ol salens bilong kredit union bilong yia 2000 na bihain.

Em i tok olsem tude ol memba i ken luk luk i go bek long ol samting bilong bipo sapos ol i paul long sampela wok.

Em i tok olsem dispela ting ting long wok wantem lukautim, sapotim na strongim ol memba bilong ol kredit union na ol seavings na lons sosaiti i mas stap olgeta taim na i mas i go yet long long yia 2000.

Mista Kamit i tok ol salens bilong ol kredit union bai go bikpela bai ol samting ol wei i stat long senis.



MOROBE SEVINGS NA LON SOSAITI LIMITED

AKNOLISMEN

Bod na menesmen bilong Morobe Savings na Lon Sosaiti i laik tok amamas long Nesenel Federesen ov Savings na Lon Sosaiti long bikpela sapot long developmen bilong Savings na Lon Sosaiti muvmen insait long Papua Niugini.

Olsem wanpela nupela Sosaiti mipela i laik stap olsem memba bilong dispela bikpela famili insait long yia 2000 na bihain. Yuniti em i wanpela ki samting bilong Savings na Lon Sosaiti muvmen.

Olsem wanpela patna long bihain taim wantaim Nesenel Federesen bilong Savings na Lon Sosaiti, mipela laik serim liklik developmen insait long Morobe provins long gutpela sindaun bilong ol Morobe pipel. Morobe Savings na Lon Sosaiti i sanap makim ol pipel bilong Morobe i stap insait long provins na tu long narapela provins.

Sevim moni wantaim MOROBE SEVINGS NA LON SOSAITI
Long helpim yu
Insait long yia 2000

- Skul fi bilong ol pikinini
- Pe bilong haus sik na dokta
- Ol samting bilong mekim haus
- Marit
- Bisnis projek yu laik statim

Kam na lukim mipela, taim i stap yet.

Mipela i stap long Vele Rumana, Graun Floa

P.O. Box 3488, Fourth Street, Lae
Telepon: 422 1777 Fax: 472 1778



FEDARE SIN BILONG SEVINGS NA LONS SOSAITI - 2000 NA BIHAIN

SAPLIMEN BILONG WORD PUBLISHING

Sasaiti bilong ol Morobe pipel

MOROBE Savings na Lon Sasaiti i kirap bek gen long matmat. Na bikpela tenku bilong dispela i go long Gavana bilong Morobe, Luther Wenge.

Morobe Savings na Lon Sasaiti i ben kirap ol wok bilong en long 1964. Helpim mani bilong dispela sasaiti i bin kam long Risev Benk bilong Australia.

Stat long 1964 i kam inap long 1970, wok bilong sasaiti tu i gro na kamap bikpela kwiktaim tru. Tasol 10-pela yia bihain long 1980, wok i stat long bagarap, na i no longtaim sasaiti i pas olgeta i kam inap long las yia.

Long dispela yia provinsal gavman tu i sindaun paitim toktok na skelim ol samting. Gavman i luksave olsem wok bilong dispela sasaiti inap tru long helpim ol pipel bilong Morobe, namba wan tru em ol memba bilong sasaiti.

Tasol i no ol dispela lain tasol. Morobe provinsal gavman i laikim tru olsem wok bilong sasaiti i mas aut long ol pipel bilong en long ples. Bikos planti bilong ol i save painim hat tru long kisim dinau mani na helpim long ol bisnis benk.

Olsem na ol opisa bilong Morobe provinsal gavman i paitim toktok wantaim ol lain bilong Benk ov PNG na tok orait long kirapim wanpela Savings na Lon Sasaiti bilong ol pipel bilong Morobe. Nau ol i kolim dispela sasaiti olsem Morobe Savings na Lon Sasaiti.

Astingting bilong dispela sasaiti em bilong helpim ol memba sevim gut

mani bilong ol na lainim ol rot na pasin bilong kisim dinau mani na bekim hariap Morobe gavman i bilip olsem bihainim dispela rot, ol pipel inap stretim sindaun na laip bilong ol long ples.

Long mun, Mas olpela gavana bilong Benk ov PNG Morea Vele i bin go long Morobe provins na opim dua bilong dispela sasaiti long namba wan taim tru. Na long dispela taim i kam inap nau. Namba bilong ol memba i go pinis long 1278. Na namba ya i karamapim olgeta 9-pela distrik bilong provins wantaim ol arapela pipel bilong Morobe husat i stap wok ausait long provins.

Sasaiti i baim pinis samting olsem K76,729 olsem dinau mani i go long memba aninit long kain kain wok projek em ol i gat long em.

Wok bilong sasaiti karamapim olgeta pipel bilong Morobe, ol dispela lain husat i stap long provins na ol dispela lain husat i stap long ol arapela hap bilong kantri.

Fi bilong kamap memba em K2, na mak bilong mani long opim akaun em K20. Sasaiti bai givim ol memba wan pasbuk bilong pulim mani i go insait. Na i nogat tambu long hamas mani em wan wan memba i laik putim. Dispela em laik bilong memba tasol.

Sasaiti i save givim dinau long ol wok bilong baim skul fi. Kago bilong tred stua, pulim isi bisnis, ol samting bilong wok haus kos bilong matmat kos bilong ka, banis kakaruk, ol samting bilong wok didiman na long bekim ol arapela dinau.



PNG Teachers Savings & Loan Society Ltd

PNG Teachers Savings & Loan Society Ltd is proud to be part of the Federation of Savings and Loan Societies Ltd. and we endeavour to work together with the Federation as it prepares to meet whatever challenges that may come as we enter the next millennium.

PNG Teachers Savings and Loan Society, Combing Regular Savings! Lending to one another at the Lowest Possible Rate!

We are proud to provide the following services for our 18,000 valued financial members:

- Safe and convenient avenue of savings for future financial security with and interest accumulated at 6.6% per annum.
- Prompt service of loan payments.
- A 1:1 and 1:2 or more ratio of savings to loan is applied in member favour.
- A low interest rate of 12% per annum on reducing balance of loans.
- Free Loan Establishment fee.
- Free Loan Protection Insurance.
- Interest paid on members savings monthly.
- Dividends paid to members at the end of each financial year.
- Special Savings for Christmas Festive Season.
- Interest of 6% per annum on Christmas Savings Account and,

- Insurance facilities for health and life at a low premium.

MISSION AND MEMBERSHIP

OUR SAVINGS & LOAN SOCIETY

PNG Teachers Savings and Loan Society Ltd (PNGTSL) is a co-operative Financial Organisation owned by its members, operated on democratic principles, serving a common interest group. Its purpose is to encourage savings, from which those accumulated savings are used to make loans and provide additional services to members in order to improve the standard of living for themselves, their families and the community they live in.

Our society is guided by the universally adopted philosophy of co-operation and self-help.

OUR MEMBERS

Our common interest group consists primarily of teachers, public servants involved with education in general, lecturers and ancillary staff employed in government schools and colleges throughout Papua New Guinea.

OUR OBJECTIVES

The following objectives are contained in the

Standard Rules of the Savings and Loan Societies Act of PNG:-

- To encourage habits of thrift amongst its members;
- To educate its members in financial responsibility;
- To receive savings from its members;
- To make loans from that accumulated fund to its members and
- To engage in other activities as maybe prescribed for the purpose in the Standard Rules of The Savings and Loan Societies Act.

OUR MOTTO - TSL

THRIFTY, SECURITY AND LOYALTY - TSL

Thrift - Through the Society, we learn to save regularly, borrow wisely and repay promptly.

Security - The Society is our Security - when all other avenues of gaining financial assistance fail.

Loyalty - As teachers, the Society is a matter of being loyal to a group in which we share our common bond. Together we strive for excellence in money management.

Our office are located at:

HEAD OFFICE:

John Guise Drive, Waigani
P.O. Box 6037
Boroko, NCD

Highlands Regional Office

P.O. Box 787
Mt Hagen, WHP

Momase Regional Office

P.O. Box 1186
Lae, Morobe Province

NGI Regional Office

P.O. Box 1333
Kokopo, East New Britain



FEDARE SIN BILONG SEVINGS NA LONS SOSAITI - 2000 NA BIHAIN

SAPLIMEN BILONG WORD PUBLISHING

Plis na Stet Sevings na Lons Sosaiti

Polis na Stet Sevings na Lons Sosaiti limited i bin regista wanter Benk bilong Papua Nuigini aninit long Sevings na Lons Sosaitis Ekt.

Em i bin stat long 1975 wanter 200 membas bilong Royel PNG Konstabuleri, na hamas pela yia i go pinis em i wok long gro na nau ol i gat mo long 7000 membas.

Bifo ol i save kolim ol long Polis Assosiation Sevings na Lons tasol bihain ol i senism i go long Plis Sevings na Lons Sosaiti na bihain long em ol i senisim i long nem ol i wok long yusim nau, Plis Stet na Sevings na Lons Sosaiti.

Ol i bin senisi nem bilong bikos nau ol i no save kisim ol polis tasol olsem ol memba ol i save kisim ol narapela memba bilong publik sevis.

Sampela long ol ol fes publik sevis long join em ol lain bilong PNG Civil Fire Service, Attorney Generals Dipatmen, Nesenel Kot, Megistret Sevises, Opis bilong Praim Minista na ol arapela gavman dipatmen olsem helt, fainens, trenspot, opis bilong sivil eviasen, weks na Nesenel Musiem

Nau yet ol i gat planti man meri bilong ol arapela gavman dipatmen, ol provinsel administreta na ol ste-

tutrei bodi olsem, Intanel Revenu Komisen, Kopra Maketing Bod, Telikom, POSF, Wata Bod na Nesenel Forestri Atoriti.

Polis na Stet Sevis na Lons Sosaiti i kwalifaid na i gat gutpela rekot bilong provaidim ol sevis na sapot i go long ol memba bilong ol.

Ol i bin gat ol komited dairekta olsem Joseph Bemu, Ben Simanjon, Adolph Sawaer, George Munagun, John Kingati, Gary Baki, Edward Aupong, Wellington Siega and na let Gregory Buibui bilong olpela bod. Lik lik tok tu olsem Joseph Bemu, wanpela foma siaman bilong bod (1993-97), i bin wanpela gutpela lida husat i bin save givim olgeta taim bilong em long developim sosaiti.

Bod bilong nau em i komited long mekim gutpela wok. Siaman Gary Baki na deputi siaman Adolph Sawaer na ol arapela memba bilong bod olsem George Munagun, Moses Tengen, John Kingati, Joe Goloki na Edward Aupong i wok hat long putim ol polisi bilong sosaiti long karim oparesin bilong em long 2000 na bihain.

Ol i save wok aninit long moto bilong ol "Mipela i fokused long ol sevis bilong ol membas".



• Antap: Ol lain bilong FE SALSO i givim presen.

• Lephan: Jenerel menesa bilong Plis Stet Sevis Sevings na Lons Michael Koisen.



POLICE & STATE SERVICES Savings and Loan Society Limited

REGISTERED UNDER THE SAVINGS AND LOAN SOCIETIES ACT
A MEMBER OF THE PAPUA NEW GUINEA FEDERATION OF SAVINGS AND LOAN SOCIETIES
A MEMBER OF THE AUSTRALASIAN FEDERATION OF POLICE CREDIT UNIONS

Papua New Guinea is a land of many cultures and traditions practiced over thousand of years. Culture to many of us is the source of our identity, heritage and strength. It is through sharing and caring that we build a strong and stable nation of people.

At the Police and State Services Savings and Loan Society, we have one culture that we practice and it stands out - our focus on serving our members promptly and efficiently.

We have grown from just taking care of our policemen and women to sharing our services with the employees of the State of Papua New Guinea. That is why we can be proud to say we are truly a savings and loan society for all public servants in the country.

- SAVINGS
- SCHOOL FEE CLUB
- LOW INTEREST LOANS
- MEDI-LIFE INSURANCE

WAIGANI HEAD OFFICE - PHONE 325 9844
P.O. BOX 855, WAIGANI, NCD

LAE OFFICE - PHONE 472 1738
P. O. BOX 2237, LAE, MOROBE PROVINCE

MT. HAGEN OFFICE - PHONE 542 2702
P. O. BOX 412, MT. HAGEN, WESTERN HIGHLANDS PROVINCE

FOR MORE INFORMATION ON MEMBERSHIP PLEASE CALL ANY OF THE SOCIETY'S OFFICES TODAY

"We are Focused on Members Service"



FEDARESIN BILONG SEVINGS NA

FESALOS i makim ol hap long ek

Sevings na Lons Muvmen i wok long gro long sait bilong membaship na ol wok ol i wok long mekim insait long kantri, jenerel menija bilong Fedaresin bilong ol Sevings na Lons Sosaiti (FESALOS), Luke Polangou i tok

Tasol em i tok olsem ol PNG seving na lons sosaiti i gat bikpela sans stret long developim ol yet olsem wanpela ektiv muvmen na i nidim hat wok na olgeta man meri i mas wok wantem na sapotim.

Insait long frem wok bilong rivaitelaisim muvmen insait long PNG, FESALOS wantem Benk bilong PNG i kisim ol sampela steps long putim wanpela rekonstraking program.

Mista Polangou i tok olsem dispela program em bilong buildim ol institusene, fainisel na humen risos bilong ol muvmen.

Hap bilong dispela wok em long kamapim ol nupela mak o taget bilong nupela milinim long stat long yia 2000.

FESALOS bai makim ol eria olsem, yut, ol meri, ol employa husat i save bes long komuniti, ol komuniti projekt na ol lik lik entraprais na sait bilong bringim sevis bilong ol narapela kredit skim.

"Mipela i laik ol yut na ol meri long tek pat, long kamapim nupela wok, long halivim ol komuniti projekt na ol lik lik entraprais, long provaidim edvais na skulim ol arapela lik lik kredit skim long sait bilong buk kiping," Mista Polangou i tok.

Long 12-pela mun nau, FESALOS i wok long makim ol provinsel sosaiti. Tupela ol long sosaiti ol i bin kamapim dispela yia tasol na nau namba bilong ol provinsel sosaiti i sanap olsem fopela. Wok i go yet long kamapim tupela mo provinsel sosaiti long yia 2000.

Mista Polangou is tok tu olsem sans bilong developim ol employa-besed sosaiti i antap yet na i nogat planti tumas. Namba bilong ol ektive sosaiti i abrusim 19 na i go long 23.

Ol arapela hap we FESALOS ba luk luk, long en em:

• Sevings na Lons Sosaitis Ekt

Benk bilong PNG na FESALOS i wok long wok wantem long mekim sampela senis we ol i bin pasim long 1995.

Tasol, dispeal Ekt i nidim bikpela senis yet. Intarim bod i stat tok tok pinis wantem BPNG long senisim dispela Ekt. Ol kopi



□ Lonsing bilong East Nu Briten Sevings na Lon Sosaiti long Julai 1993. ▲

bilong draft bilong David Daniel, ol tok tok bilong Ekt Riviyu komiti, na ol rul bilong Fedaresin i raun pinis long olgeta sosaiti insait long PNG we ol i ken givim sampela tok tok bilong ol. Dispel bai go yet neks yia.

• Komputaraisasin

Wok i stap yet long ol sosaiti senisim ol wok bilong ol i go long FACT komputa sisten. I gat olsem 7-pela sosaiti wantem fedaresin husat i senis pinis i go long dispela sistem. Fopela arapela sosaiti i wok long plen long mekim ol senis neks yia.

• Insurens

Sosaiti holim ol forum na i wok long tok tok long insurens. Nupela bod tu i wok long tok tok long dispela. Ol i kisim wanpela konsalten long luk luk long wanpela lokal

VISIN O TOK PIKSA

FESALOS i laik kamapim olsem nesene ol ogenaiesin we ol memba yet i ken kontrolim, na long promotim, reipresentim na sevim ol arapela strongpela, Sevings na Lons Sosaiti insait kantri.

- Muvmen plen bilong grot, developmen na stabiliti;
- Teknikel na oparesinel sapot;
- Sentrel fainensel servises;
- Reipresentesin bilong muvmen;
- Proteksen bilong intares bilong ol memba; na
- Trening na skul.

MISEN STETMEN

Plen bilong em long developim na strongim wok bilong ol Sevings na Lons muvmen long bungim ol sosel na ekonomil nid bilong ol memba bilong ol wantem:



▶
• Ol wokman meri bilong Sevings na Lons Sosaiti wantaim ol famili bilong ol i kaikai wantaim long amamasim Wel Credit Union Dei.

LONS SOSAITI - 2000 NA BIHAIN


spendim o long apim membaspip

OL WOK BIHAIN

Bod i ting ting long long wok ol bai mekim long wanpela miting eli long dispela yia na ol i pasim tok olsem ol bai luk luk long dispela samting.

1. Strongim wok bilong skulim ol ofisiel na wok man na meri.
2. Wok strong long komuniti projekt.
3. Kirapim wok wantem ol meri.
4. Kirapim wok wantem ol yut.
5. Strongim wok bilong ol liklik binis.
6. Kirapim sosaiti bilong wanwan bisnis (Corporations)
7. Helpim ol arapela kredit skim.
8. Riviyuim lo bilong sosaiti.
9. Stretim eleksen bilong bod

• Ol lain husat i bin go long Asia Credit Union Forum long Bali.



insurens kamapani bilong ol sasaiti long kisim intares. Ol i wok long luk luk yet long dispela.

• Intanesinel Rilasesp

Dispela Teknikel Asistens projekt wantem BPNG i bin pinis long Julai 1998 na i no gat arapela yet. Olsem ol lain husat i save benefit long dispela projekt mipela i hamamas long en na mipela i wok long luk luk fowad long dairekt involvmen.

Mista Polangou i tok olsem Fedaresin i laik luk luk long ol narapela hap long wok we bai ken kisim sampela halivim long CUFA long ol i provaidim link.

CUFA i givim halivim taim ol i kamap ol i go pas long ol woksop insait long PNG.

Mista Polangou i tok olsem ol i kisim pinis olrait long rinuim membaspip bilong ol long Asian Confederation of Credit Union League (ACCUL).

• Trening na skul

Long las 12-pela mun i bin gat sampela woksop i bin kamap long halivim ol wok man meri bilong kredit skim. I bin gat ol impoten woksop i bin kamap long Key Performance Indicators (KPI) na i bin pinis wantem wanpela program bilong PNG Savings na Lons Sosaiti.

Mista Polangou i tok olsem trening ol i kisim long OCCUL na CUFA i wok long halivim.

Em i tok olsem bai gat ol arapela program bai kamap long halivim ol ofisels, dairektas, na skul bilong ol membas.

• Bod na menijmen

I wok long gat ol wok long kamapim bod gen. Aninit long 1998 intanesinel Kredit Yunion Selebresins, Gavana bilong BPNG i makim na i tokaut long ol man meri long ol membaspip bilong intarim bod bilong 7-pela memba husat i makim ol sosaiti. Long dispela bod ba i gat tupela husat bai makim BPNG. Dispela bod i stat pinis na ol i bin tok save long representativ long Novemba 1998.

Dispela bod i kamapim pinis gutpela wok na sindaun wantem BPNG na i wok long kamapim wanpela strongpela patnasip wantem benk



• Ol wokman bilong FESALOS i sindaun amamas long taim bilong Credit Union Day selebrasen.

• Ol wokman na famili i pilai volibol



EAST NEW BRITAIN SAVINGS & LOAN SOCIETY LTD

STETMEN

Dispela tingting bilong kamapim wanpela Sevings na Lons Sosaiti bilong provins i bin aidiya bilong olupela provinsel gavman bilong premia, Sinai Brown. Dispela tu i bin kam aninit long rivaitelaisin bilong ol sevings na lons sosaiti long PNG, Australian Foundation for International Credit Union Development and World Council of Credit Unions.

Ol papa stret bilong ENB Sevings na Lons i bin Ellison Kaivovo na Na Sinai Brown husat i bin wok hat stret long kamapim wan; ela sosaiti bilong halivim ol gras ruts man meri long provins.

Twenti pela man, husat planti long ol i bin wok long pablik sevis na ol arapela man i bin kamap ol fes memba bilong dispela sosaiti taim ol i bin registarim nupela. Ol i bin registarim aninit long Sevings na Lons Sosaiti Ekt, long namba 18 de long mun Februari, 1993 na long namba 9 dei lon mun Julia, 1993, gavana bilong Benk bilong PNG long dispela taim, Sir Henry ToRobert i bin lonsim.

Long dispela taim Provinsel Edministresion is bin kisim Mista Bob Campbell, wanpela wait man long likwidetim o pinisim ol olupela sosaiti insait long provins na long kamap menesa bilong dispela nupela sosaiti. Mista Campbell i bin menesa i go i nap long 1997 taim ol i bin senisim wantem wanpela man PNG yet. Taim ol i bin senisim em Mista Campbell i bin stap yet wantem sosaiti olsem wanpela edvaisa i go i nap long 1998.

Ol dispela man i bin ol fes man long lukautim opis bilong Sosaiti:

| Bod ov Dairektas | 1993 | 1999 |
|---|--|--|
| Siaman Deputi Siaman Membas Membas Membas | Sir Alkon Tololo Mr. George Monoa Mr. Mellie Gaius Mr. Jack Namaliu Mr. Ivan Tagai | Sir Alkan Tololo Mr. Owen Ainui Mr. Poe Apelis Mr. Jack Namaliu Mr. Ivan Tagai |
| Supavaisor komiti | 1993 | 1999 |
| Siaman Membas Membas | Mr. Ellison Kaivovo Mr. Natalau Kakikus Ms. Elpin Samson | Mr. Ellison Kaivovo Mr. Natalau Kakikus Ms. Elpin Samson |
| Lons komiti | 1993 | 1999 |
| Siaman Membas Membas | Mr. John Orim Mr. Joe Balik Mr. Ivan Tagai | Mr. Paul Mission Mr. Joe Balik Mr. John Orim |

Provinsel Gavman wantem Benk bilong PNG i bin putim olsem K490,000 long namel long 1993 i go long 1995 long statim ol wok bilong sevings bilong ol membas.

Oparesin bilong Sosaiti i bin stat stret long olupela Federesin bilong Sevings na Lon Sosaiti opis long Rabaul tasol long taim bilong mauten paia long Septemba 1994, ol i bin muv i go long Kokopo Hai Skul. Spes long skul kentin i bin liklik tumas, tasol ol i bin stat wok gen long Oktoba 1994, taim planti long ol benk long provins i bin pas yet o ol i no bin givim inap benking sevis bikos long maunten paia.


Long taim bilong mauten paia, ol benk i bin strik stret long ol man na planti i bin stat long joinim sosaiti. Ol i bin givim ol sevis i go long ol pipol maski em i bin hat tumas na dispela i bin mekim na planti man i stat long putim mani bilong ol i go long Sosaiti na long 1995 membasip i bin go atap long 2,7078 na ol total sevings i bin surik i go long K2,202,830. Long 1994 ol total sevings i bin stap olsem K908,952.

Ol lon ol i save givim long ol memba bilong ol i bin go antap tu long dispela taim bihain long maunten paia. Ol namba bilong ol lor, sosaiti i givim long ol memba tu i bin abrusim 2,109 na i go long 4,118 na lon valu tu i bin abrusim K1,242,772 na i go antap olsem K2,046,746 taim ol man meri i borow long stretim gen sindaun bilong ol bihain long mauten paia.

Long sikspela kristmas nau sosaiti i wok long oparet, em i wok long gro na kamap bikpela stret na nau ol i gat fopela egensi o opis long provins. Ol ejensi bilong ol i stap long Rabaul, Kerevat, Palmalmal long Pomio, na Molot long Duke of York Ailens. Ol plen i stap pinis long apgredim na senisim ol dispela ejensi i go long sab brens na long ful brens long halivim long spredim

ol sevis i go long ol pipol. I wok long gat ol plen tu long surukim ol sevis bilong ol i go long ol sampela membas bilong ol husat i stap long Pot Mosbi.

Wanpela bikpela samting we i wok long halivim wok bilong sosaiti i ron gut em bikos bod na ol komiti bilong ol i stap strong na i save mekim ol gutpela disison long hao long lukautim gut ol moni bilong ol membas. I no bin gat planti senis tu long ol husat man i lukautim opis bilong sosaiti long taim ol i bin stat long 1993.



• Sir Alkan Tololo

Sosaiti i muvim het opis bilong i go long Kokopo taim Gavman i mekim plen long mekim Kokopo Taun i kamap olsem Provinsel Hetkwatas bilong provins. Nau yet ol i lisim wanpela opis plen tasol ol i wok long mekim plen long bildim wanpela opis bilong ol sapos ol i baim sampela graun long taun.

Moa long 67% long ol memba bilong ol em ol man long ples husat i save kisim mani long kes krop olsem kopra na kakao. Ol memba bilong ol tu i wok long praivet na long pablik sekta na ol i save kontribut long wanwan fot nait o long ol mantly salari bilong ol.

Em i gutpela tu long lukim sampela long asivment bilong sosaiti i kam i nap nau.

1. Ol mani i save kam insait long wanpela yia i abrusim K2,03034 na i go long K953,527.
2. Net profit o win moni bihain long wanpela negativ (K92,198) i go long K378,317 bihain long ol i bin baim intarest bilong fespela sikspela mun long Jun, 1999.
3. Ol mani i kam bek i bin nap olsem K459,119 long pinis bilong 1998 yia.
4. Sevings bilong ol memba i abrusim K146,106 na go antap long K7,813,191.
5. Total bilong ol aut standing lon i abrusim K57,640 na i go long K3,217,220.
6. Bifo long 1993 long wanpela yia mipela i bin givim 175 lons na long ol fes nain-pela mun i go i nap long Septemba bilong 1999 ol lon mipela i bin givim istap olsem 6,612.
7. Membasip bilong mipela i bin stap olsem 648 long 1993 na long Septemba, 1999 i bin 6,612.

Sosaiti i bin mekim fes profit o win mani bilong em bihain tasol long tripela yia long 1995 na em i bin stat long baim ol dividen long 4% ret long 1996. Taim ol i bin mekim ol senis long Sevings na Lons Sosaitis Ekt, ol i bin stat long baim intarest i go antap long ol sevings bilong ol membas long 1998. Ret bilong intarest i stat long 5.5% na bihain em i bin go antap long 6% long 1999. Ol i save baim intarest tu long sikspela mun long June na long Demsemba.

Bikos ol i wok long lukim sosaiti i wok long gro bikpela, ol i wok long mekim wanpela rekontruksa o senis we i lukim pinis wanpela prodaksen bilong wanpela oparesin manual o buk. Dispela buk bai halivim na stiarim oparesin bilong ol i go insait long nupela milinim.

Ol gutpela wok o saksen i kamap bikos long tripela samting.

1. Bikos ol bikman i larim ol i wok tasol na ol i no intafia.
2. Ol i save givim ol pipol narapela wei long kisim mani na tu dis pela mani em bilong ol yet.
3. Ol memba yet i wok long kisim ol benifit long bungim ol mani bilong ol long halivim ol arapela memba.

Tasol, las tru wanpela rison wai sosaiti i ron gut em bikos long komitmen na dedikesin bilong ol wok man bilong sosaiti yet. Eksperiens bilong ol i halivim tru long lukautim sosaiti na long bringim i kam long hap em i stap long em nau na nau yet planti man meri save ai gris long ol.

Tok olrait i kam long

a. Tololo
Sir Alkan Tololo
President

Japan bisnisman pusim Saina hotel menesa long brukim skru long em

SAINA gavman i rausim wanpela Japan bisnisman long lusim Saina na go bek long Japan bikos em i bin pusim wanpela meri hotel menesa long brukim skru na tok sori long em long sevim em rong kaikai long hotel.

Yasua Suga husat i gat 50 krismas bilong Japan i bin go kaikai long hotel taim dispela hotel i sevim em rong sup. Em i bin mekim oda long kisim ol sup bilong ol solwara abus. Tasol hotel wokman i abrus na givim em sup bilong ol gaden kaikai.

Mista Suga i kros na mekim bikpela komplem long dispela taim olsem na hotel menesa (meri) i kamap na tok sori na i tok sapos ol i ken skelim nupela sup gen bilong bikman ya. Tasol dispela Japan bikman ya i kros moa na askim hotel menesa ya long tok sori long em na brukim skru long floa.

Hotel menesa i tok nogat tasol bihain em i wanbel na brukim skru long pasin na stail bilong Saina kastom bikos ol i stap long Saina.

Tasol Mista Suga i bin pusim hotel menesa ya long solda bilong em na kikim tupela lek bilong hotel menesa long i mas go daun long floa na brukim skru.

Plis long Wuhan i kisim ripot long dispela na bihain ol i rausim paspot visa bilong Suga na givim em oda long hariap lusim Saina na go bek long Japan na i no ken go bek moa long Saina inap tupela krismas bihain.

Dispela hevi i bin kirapim planti kros na belhat namel long ol Saina manmeri taim ol i harim dispela nius. Saina na Japan tu long dispela taim i gat sampela bel kros namel long tupela bikos long raun bilong Tokyo Gavana Shintaro Ishihara long go raun long Taiwan we Beijing (Saina ketkota) i ting Taiwan em wanpela birua provins.

Yasua Suga em wanpela menesa bilong kapet meka kampani long Wuhan siti, Sentrel Saina.



• Wanpela Wes Irian man i hapim han na soim sapot na strong bilong em olsem Irian Jaya i mas kamap wanpela Independens kantri bilong em yet. Ol pipel bilong Irian Jaya i bin mekim bikpela wokabaut mas long las wik Sarere long Jakarta siti long soim pait bilong ol long kisim independens. Beksait em flak bilong ol, ol i kolim Moning Sta. -

Piksa i kam long THE COURIER-MAIL.

Pawa lain kamapim kensa long pikinini i no klia

I bin i gat bilip olsem ol pikinini i save stap na groap klostu long ol pawa lain i isi long kisim sik kensa. Tasol wanpela nupela wok painimaut i soim olsem dispela i no tru olgeta na i no klia.

Dispela wok painimaut i kamap long Briten na i tokaut olsem sik lukemia (leukaemia) o sik kensa i kamap long ol pikinini husat i groap klostu long pawa lain o longwe long pawa lain i wankain tasol.

Dispela wok painimaut i stadi long 4452 pikinini krismas bilong ol anarit long 14 na bihain glasim wantaim 2226 pikinini husat i bin kisim kensa pinis long las foapela yia i go pinis. Dispela ol pikinini ol i glasim gen wan wan wantaim ol narapela pikinini husat i no bin kisim wanpela sik. Long dispela we ol i painimaut olsem ol pawa lain o ol narapela samting insait long haus we i save wok long pawa i no oltaim save kamapim sik long ol pikinini olsem ol i save bilip bipo.

Dispela ripot i bin kamap long Britis medikal genel (British medical jour-

nal).

Ol WHO saveman (scientists) i bin tok dispela em wanpela bikpela wok painimaut i bin kamap tasol dispela i no bin kamap olsem wanpela stadi we ol saveman i hop long en.

Sik bilong kru i no klia long ol dokta

Wanpela bilong ol dokta husat i save mekim wok painimaut long bodi bilong ol manmeri i dai pinis (coroner) i tok olsem ol dokta na ol wok manmeri i mas stadi gut long ol sik i save kamap long kru.

Man i wokim dispela toktok em Dokta Alastair Hope bilong Perth long kantri Australia. Em i tok ol dokta i wok long ol haus sik i mas kisim gut skul long ol kain sik i no klia long planti manmeri na i save kilim ol i dai.

Mista Hope i bin mekim dispela toktok bihain long wanpela yangpela meri i bin dai bihain long em i kisim wanpela sik long kru bilong em we ol i kolim 'meningococcal'.

Dispela meri nem bilong em Amanda husat i gat 18 krismas i dai long dispela sik bihain long em i mekim wanpela bot resis long Sidni. Dokta Hope i tok i luk olsem ol dokta long haus sik i no bin painimaut gut wanem kain sik tru em Amanda i bin kisim.

Insait long 13-pela awa olgeta ol dokta i no bin givim marasin (antibiotics) long Amanda long wanem ol i ting em i kisim sik tasol long sampela liklik binatang ol i kolim 'virus'.

Dokta Hope i tok em i bilip olsem sapos ol i givim antibiotiks long Amanda bai ol inap savim laip bilong em.

Em i tok tu olsem ol pepa bilong ol kain

kain wok painimaut long ol dispela kain sik i mas stap klostu long ol wok manmeri long haus sik bai ol i ken luksave na glasim gut sik i kamap long kru bilong ol pipel.

Yangpela Amanda i dai long sik meningococcal septicaemia long Oktoba 12, 1997.

Amanda i bungim indai bilong em bihain long em i stap insait long wanpela bot resis i kamap namel long ol Yunivesiti sumatin bilong Australia long bikpela wara ol i kolim Nepean River long westen Sidni. Long dispela wara tasol bai bikpela bot resis bilong Olimpik i kamap long yia 2000.

BOROKO Foodworld

Krismas Spesol

Lukim Supa Spesel !!

| | | | |
|---------------------------|--------|---------------------------|-------|
| Roots Rice 1kg | K1.17 | Ilimo Kwik Kai 900gr | K4.95 |
| Trukai Rice 1kg | K1.65 | Globe C/B Round 300gr | K2.45 |
| Trukai Rice 10kg | K15.25 | Gold Nuggets 25gr | .25 |
| Suncrush Cordial 2 litres | K3.95 | Weet Bix 375gr | K3.90 |
| Maggi Noodles 85gr | .45 | Arrow Beef 85gr | .40 |
| Sunshine Milk UHT 1 litre | K2.34 | Home Brand Ice Cream 2Ltr | K3.90 |
| | | Zenag Stewing Pieces 1kg | K4.74 |

Planti moa kaikai prais i go daun long en!

Ph: 325 7566, 325 0863 Fax: 325 7096

Wes Irian save tingim Desemba 1 olgeta ya

Taim moa long 10,000 manmeri bilong Irian Jaya i go bung long provins las wiken long apim flak bilong soim bikpela laikim bilong ol tru long kism independens, dispela bung bilong ol i soim tru bel na tingting ol i gat longpela taim i kam long kism independens bilong ol yet long han bilong Indonesia.

Ol i prea, singsing na krai na singaut wantaim na wokabaut wantaim isi tasol i go.

Long pastaim, taim ol Wes Papua i mekim kain bung olsem na apim Moning Sta flak bilong ol, ol Indonesia ami i save sutim ol o holim na kalabusim ol long rum gad. Olgeta bung bilong ol i save bagarap taim atoriti i save kamap na stapim ol. Na rebel grup bilong ol OPM (Organisasi Papua Merdeka, o Free West Papua) i save wok hat long dispela pait bilong ol long kism independens.

Long dispela wik, ol Wes Papua i mekim wanpela bikpela wokabaut mas tru bihain long ol i bin stap aninit long Indonesia 30

krismas olgeta tasol Yunaitet Nesen konsvensen lo ol i kolim Fridom ov Sois (Freedom of Choice) long 1969 i givim ol dispela orait long mekim dispela wokabaut mas.

Long planti hap senta long Jakarta yet, Indonesia atoriti i larim ol i go het long mekim mas bilong ol bihain long ol lida bilong Wes Papua i tokim ol olsem bai ol i lusim flak i kam daun long 6 kilok long apinun.

Tasol ripot i tok long Timika ples klostu hap bilokg fripot kopa na gol main, Indonesia plis fos i bin sut long sotgan long stapim ol manmeri long dispela bung bilong ol na bagarapim mak olsem 53 manmeri olgeta. Dispela kisen inap mekim hat olgeta long pait bilong ol Wes Papua long kamapim independens bilong ol.

Desemba 1 em bikpela de tru long ol Wes Papua lain bikos long Desemba 1 1971, kantri Dats i bin promis long givim ol inde-

pendens long dispela taim.

Tasol long 1962 taim Indonesia i kism planti hap teritori bilong ol, presiden Sukarno aninit long lidasip bilong em ol i kism Independens na tokaut tu olsem ol bai tekova long olgeta Dats Is Indis wantaim Wes Papua.

Kantri Dats i bin laik larim Wes Papua i stap bilong ol yet bikos long lukluk bilong lotu, ol West Papua em ol Kristen na tu ol i Melanesian pipel na i no wankain olsem ol Muslim lotu na Malay lain bilong Esia we Indonesia em hap bilong ol.

Wari i kamap olsem nogut woa i bruk namel long Indonesia na Holan bai pusim Sukarno (presiden) long kism sapot bilong ol lain Soviet, Amerika wantaim Australia i kism narapela rot long kamapim polisi we Yunaitet Nesen i kamapim vot we i mekim Indonesia i makim Wes Papua olsem hap bilong ol.

Toktok bilong bel isi long Ireland i kamap gut

LONGPELA tok pait long kamapim bel isi long Noten Ireland i luk olsem em bai pinis bihain long wanpela Gud Fraide Agrimen we i tok long senisim konstitusen bilong Ireland na fes kabinet miting bilong Noten Ireland Asembli long kamap.

Agrimen bai pinisim 30-pela yia bilong pait. Moa long 3000 pipel i bin dai long dispela pait na ol manmeri i bilip olsem dispela ol pait bai pinis sapos nupela gavman i kamap.


Dispela pis toktok kism strong bihain long Iris Republikan Ami (IRA) i makim wanpela mausman long stap insait long indipenden komisen long toktok long rausim ol gun na samting bilong pait.

Tasol tupela mausman bilong Demokratik Unionist Pati i stap long dispela miting bilong wanem ol i no amamas long tupela minista bilong Sinn Fein, wanpela politikel grup bilong IRA, husat i bin stap insait long dispela miting.

Tasol ol lida husat i stap long dispela miting i amamas na olgeta wanbel long gupela sindaun i mas kamap.

Dispela miting bai kamap olsem histri bilong dispela kantri. Ol ambasada bilong Ireland na Briten i bin sainim nupela agrimen long Dublin long husat bai gavanim Noten Ireland, na fes taim ol i kamapim "home rule".

10% OFF



Boral Energy bai givim 10% Diskaunt long taim yu baim ol Boral Energy appliances long mun December tasol.



BORAL ENERGY



Kanudi - Port Moresby, Lae, Rabaul, Madang, Wewak



Georgie em pikinini man

LONG 1974, bihain long George Bertrand Beyer bilong Nu Silan, i lukim ol man i dresap olsem ol meri (drag queen) long wanpela nait klab na em i kism tingting long kamap meri.

Taim em i makim 17 krismas bilong em, George i go long wanpela praivet haus sik Carmen Balcony na kism operesen long kamap meri. Taim em i senis, em i senisim nem olsem Georgina na em i go wok olsem wanpela ektres na pamuk meri. Bihain em i mekim nem olsem wanpela politisen na wanpela fes man long tanim olsem meri na kamap memba bilong palamen.

Tupela wik i go pinis Georgina i winim sea bilong Wairarapa bilong Leiba Pati long jenerel ileksen bilong Nu Silan.

Win bilong makim nupela tingting bilong ol manmeri bilong dispela kantri olsem ol kain lain olsem Georgina husat ol planti lain i save les long ol na save kolim ol "geli geli" i ken karimaut ol wok bilong komyniti na wok long stretim ol sindaun bilong pipel.

Georgina yet i tok olsem dispela i no samting bilong sem o bilong haitim, tasol ol niusmanmeri tasol i save putim long stori bilong ol.

Em i tok olsem ol vota bilong em i gat bilip long wok em i ken wokim olsem na em i bin winim dispela sea. Ol i votim taim em i kamap long ples Carterton husat i gat 7000 populesen long Wairarapa Pleins not long Wellington taim em i nogat wok na i laik malolo.

Taim i tanim na kamap meri, Georgina i save werim ol dres bilong wanem em i laik luksave long ol tingting o tok orait bilong ol wankain lain olsem em. Em i save werim sais 18 dres na skirt.

Long 1993 em i kamap olsem fes man tanim meri (transsexual) long kamap memba bilong lokol distrik kaunsil, na long 1995 em i kamap olsem fes Maori meri meiya na nau MP bilong Nu Silan.

LAI PSTAIL

Gutpela kristen famili em as bilong gutpela komyuniti

LEO WAFIWA i raitim

Mi save go kam long lotu long olgeta Sande na kolim mi yet olsem wanpela kristen. Na mi ting dispela em inap long amamasim papa God long kisim mi go long ples Heven.

Na tu mi save ting olsem God papa mekim dispela graun bilong hevi, bihainim pekato bilong Adam na Eve long kaikai pikinini bilong diwai. Bikos baibel i tok tu olsem i nogat wanpela stretpela man long dispela graun, nogat wanpela man i ken go long ples Heven wantaim 100 pesen nogat sin.

Tasol dispela tingting bilong mi i asua taim mi stap insait long wanpela 4 de skul bilong kristen laip progrem long ples Waima long Kikori eria bilong Sentrel provins. Couples For Christ (CFC), wanpela ministri bilong Katolik sios i ronim dispela skul, wantaim astingting bilong strongim gutpela kristen sindaun namel long ol famili.

Namel long 30 na 40 manmeri i stap insait long dispela skul. Na mipela painimaut olsem God papa i laving mipela tru ol pikinini bilong em. Olsem na em salim wanpela pikinini bilong em tasol, Jisas Krai, i kam long ples graun na dai long diwai kros. Na blut bilong em i opim dua o rot bilong repen o senisim pasin o tanim bel. Na go long papa God.

Bihainim dispela Jisas i tok long baibel long rit bilong John. Mi tasol mi rot bilong yu long go long papa God (I am the truth, the way and the life).

Long strongim dispela tok,

baibel i tok tu long John 3:16 God papa lavim tumas ol pipel bilong em na salim wanpela pikinini bilong em tasol i kam long sevim mipela. Olsem na sapos yu bilip long em, yu bai gat amamas bilong oltaim.

Tru mipela planti kristen i bilip long dispela. Tasol olsem ol kristen, mipela i no inap go lotu long Sande tasol, bilip long Jisas, na driman long amamas bilong oltaim.

Man i go pas long CFC skul, John Niniku, i tok sapos yu trupela kristen, yu mas gat wok bilong mekim olsem baibel i tok. Em ol dispela samting:

- Tanim bel na toksave long ol pekato bilong mipela, na askim holi spirit long strongim yu long pait egens traime bilong Satan.

- Luksave long lav bilong papa God long mipela ol pikinini bilong em. Givim bek wankain lav i go long em wantaim presim em prea o lotu, tenkim em long olgeta samting em givim mipela olsem laip, na askim long blesing bilong em. "Lav em tupela samting. Taim em (God) i givim, mipela mas givim dispela lav i go bek long," Mista Niniku i tok.

- Bikos God em i spirit, mipela i mas lotuim na presim em long spirit. "Sapos mipela giaman tasol long bodi olsem kristen bilong Sande tasol, sore tumas," Mista Niniku i tok.

Long sait bilong bilip em gutpela. Tasol faith bilong mipela i wankain olsem bilip o nogat?

Em i olsem stori bilong wanpela man i kam na tok em Jisas. Na krosim bikpela longpela wara long



• Ol yangpela bilong Mekeo husat i kamap long ples Waima na singsing long taim bilong Couples For Christ skul.

rop i go long hapsait. Em krosim kam bek na askim yu long kalap antap long solda bilong em, bai em karim yu go long hapsait.

Sapos yu pret long pundaun long wara na dai, na yu tok nogat, sore tumas, yu nogat faith. Yu lukim man ya tok em Jisas krosim wara long rop na yu bilip. Tasol yu nogat faith long em.

Planti bilong mipela ol pipel bilong ples graun i wankain. Bosman bilong CFC, Mista Niniku, i tok mipela ol kristen mas luksave nau long mipela wanwan. Na wok bilong CFC em long helpim dispela.

Namba wan astingting bilong CFC ministri em long strongim kristen pasin na sindaun namel long ol famili, we i wok long bruk nabaut nau, wanpela CFC memba, Mark, i tok.

Planti manmeri bilong ples Waima na mi yet i amamas long sindaun long dispela skul. Mipela i luksave tru long sindaun bilong mipela, na bilong komyuniti na ples bilong mipela.

Bikos gutpela famili em i as bilong gutpela sindaun na amamas long komyuniti. Sapos CFC strong na holim pasim planti famili long sindaun long kristen laip, tru tumas komyuniti na kantri gen senis.

Wanpela man long Waima, husat i sindaun long dispela skul, Paul Lohia, i sapatim dispela tingting. Em i tok em i no luksave long wok bilong em olsem lida long go pas na lukautim o stretim sindaun bilong famili. "Mi amamas tru long dispela skul long save nau long duti (wok) bilong mi," em i tok. "Wanem skul i kisim stret

lewa bilong mi em maski mi bikheth man bipo, mi no save olsem God i lavim mi yet i kam inap tude. Tasol mi no tingim o luksave, na givim em dispela wankain lav olsem wanpela kristen."

Yes, olsem kristen, mipela karim nem bilong Jisas. Tasol mipela noken karim dispela nem nating. I gat wok o duti i kam wantaim dispela nem.

Maski mipela ken tok God papa bai marimari bikos em save olsem mipela olgeta em ol sin manmeri bilong graun, dispela i no inap long givim wankain lav na laikim i go bek long papa God.

Na tu mipela mas tingim, God papa em i spirit. Olsem na long lotuim na presim em, mipela mas mekim long spirit. I no long bodi tasol olsem Sande kristen.




• Ol manmeri bilong ples Waima wantaim ol tisa bilong CFC skul bihain long las de bilong skul.

FRI BAIBEL KOS LONG PAS

I kam long
wanpela pren long
America sapos yu laikim
fri kos salim nem
na adres igo long:

**WOL BAIBEL SKUL
WBS - PNG 12,
P.O. Box 9346,**



Papa snek pretim ol meri



Bipo bipo tru long wanpela ples long hap bilong Sandaun provins i gat tupela snek save stap long wanpela maunten.

Na dispela maunten i gat wanpela liklik wara tu save kamap long dispela maunten we dispela tupela snek stap insait long hol bilong dispela maunten.

Nem bilong dispela tupela snek em Sanai snek papa na pikinini.

Tupela save stap na was long ol manmeri save go kam long bus we tupela snek papa pikinini stap long em ol save go long bus stilim kaikai painim abus long dispela bus.

Tupela stap long em taim tupela save kisim smel bilong ol manmeri tupela ronim ol kilim ol na kaikai ol.

Olgeta taim tupela save mekim olsem tasol go na ol manmeri save pret long go long dispela hap bus na maunten tupela stap long en.

Bik moning tru wanpela papa graun kisim banara spia naip go long bus bilong painim abus taim em go insait long bus em stat long painim abus em painim go go kamap long bus we tupela snek stap long em.

Na taim em go kamap long wanpela diwai snek slip antap long bikipela diwai sanap long dispela hol i stap insait long bikipela maunten taim em go kamap long dispela diwai snek lukim em na snek wisil long em. Wantu tasol em tanim lukim



em slip long diwai em tanim go bek long ples na tokim ol man long ples long kisim banara spia naip kam katim diwai.

Olsem na ol i meim olsem na ol i kilim pikinini bilong snek na papa em ronawe go bek insait long hol bilong ston.

Ol kilim pikinini karim go long ples katim tilim long olgeta manmeri ol kaikai.

Na long nait yet papa snek go givim driman long man ya wantaim ol man go kilim em.

Em givim driman long ol lain ya na i tok yu wantaim ol lain bilong yu kilim pikinini bilong mi.

Olsem na bai mi bekim belhat bilong mi yet long dispela maunten.

Bai mi wet yet inap long mi bekim long ol pikinini bilong

yupela na bai mi kilim ol. Dispela tok pret bilong snek ya i save stap tude na ol manmeri i save stori na pret liklik taim ol i raun long dispela hap maunten. Em tasol stori tumbuna bilong mi.

**Greg Keniombo
Sandaun provins**

Papamama pasim mi long maritim man mi laikim



Dia LAIPPLAIN,
Mi gat bikipela laik stret long boi pren bilong mi. Em i kam tu long provins bilong mi na mitupela i tingting long marit.

Papamama bilong boi pren bilong mi i amamas olsem mitupela i kamap pren na tupela i wanbel bai mitupela i marit.

Tasol papamama bilong mi yet i no amamas long mi maritim dispela boi pren bilong mi. Tupela i pasim mi long go lukim boi pren bilong mi na mi wari tru long wanem mi laikim tumas boi pren bilong mi.

Askim bilong mi em, inap mi lusim boi pren bilong mi na painim nupela boi pren o nogat?

MI NO KLIA

Dia PREN,

Luk olsem i nogat sans long yu toktok gut wantaim papamama bilong yu na mekim tupela i sensim tingting bilong tupela na wanbel long yu ken maritim boi pren bilong yu.

Na tu, yu no bin tokaut long wanem as na tupela papamama bilong yu i no wanbel long yu maritim dispela boi pren bilong yu.

Yu ting wanem? Nogut papamama bilong yu i ting dispela boi pren bilong yu i no inap lukautim yu gut o em i no inap givim inap pe mani na ol samting long baim yu. O nogut tupela papamama i bin makim pinis wanpela man bilong yu pinis bilong maritim.

Sapos yu save long wanem as na papamama bilong yu i no wanbel long yu ken maritim dispela man orait mipela ting yu ken painim sampela rot long mekim papamama bilong yu i sensim tingting na wanbel long yu ken go het long maritim em.

Sapos yu gat wanpela memba long famili bilong yu husat yu bilipim na painim isi long toktok wantaim em orait yu ken autim wari bilong yu long em na em i ken toktok wantaim papamama bilong yu long dispela samting.

Narapela gupela samting em sapos papamama bilong yu wantaim papamama bilong boi pren bilong yu i ken sindaun na toktok wantaim long dispela wari bilong yu sapos em i isi long ol.

Sapos papamama bilong yu i bin strong yet planti taim long tupela i no sensim tingting bilong tupela orait i luk olsem yu bin sanap strong tru long luksave long dispela samting.

Yu bin skelim tu wanem as na yu gat bikipela laik yet long dispela boi pren bilong yu o nogat? Sapos yu ting olsem tingting na laik bilong yu i pas strong wantaim boi pren bilong yu orait wanpela samting em yu ken traim long no ken lukim em inap long sampela mun. Bihain long gispela yu ken skelim na lukim sapos tingting na laik bilong yu i wankain yet long em.

Nogut papamama bilong yu i wanbel long dispela kain samting.

Mipela i hop olsem yu bai groa na luksave tu olsem maski yu laikim tumas wanpela man, i gat planti arapela man we yu ken panim na laikim long wankain we. Dispela em sapos yu larim yu yet mekim olsem. Olsem na maski long yu ting yu bai no inap bungim narapela man husat yu ken laikim long wankain we.

Sapos nau ol dispela hevi i mekim na yu lusim boi pren bilong yu orait bihain yu mas tingim gut. Traim na painimaut pastim tingting bilong ol papamama bai yu no kisim wankain hevi bihain.

LAIPPLAIN

Nem: Jinna Giwisa
Krismas: 14 (meri)
Adres: Church of Christ, P O Box 102, Wau, Morobe Provins
Save laikim: Pilai volibal, mekim fani wantaim ol pren, harim musik, railim pas long arapela prens long taun o provins na go long lotu.

Nem: Freeman George
Krismas: 20 (man)
Adres: P O Box 326, Tabubil, Western Provins
Save laikim: Go lotu, singing ol lotu songs na senisim ol presens.

Nem: Fnaries Ingoiyo
Krismas: 17 (man)
Adres: Kanabea John The Baptist Primary School, P O Kanabea via Kerema, Gulf Province
Save laikim: Pilai ol spot, go long lotu, tok stori wantaim ol pren, stadi na ritim buk, harim ol musik, pilai na wok gaden.

Nem: Peter Sidik
Krismas: 12 (man)
Adres: Mazam Village, Garam Community School, Code 550, C/- Mutzing Markham district, Lae, Morobe Provins
Save laikim: Pilai soka, wokim penpren wantaim arapela manmeri, lukim TV, go lotu long Sande skul, salim pas na senisim presen.

Nem: Johnson Tadias
Krismas: 18 (man)
Adres: Kanabea Primary School, P O Kanabea Via Kerema, Gulf Province
Save laikim: Ritim baibel, harim musik na stori, pilai gita, railim pas, pilai futbol na laikim long mekim penpren.

Nem: Charles Philip
Krismas: 19 (man)
Adres: Mazam Village, Garam Community school, Code 550, C/- Mutzing Markham district, Lae, Morobe Province
Save laikim: Lukim TV, bekim pas i go kam, go raun lukim arapela prens long arapela provins, go lotu, pilai soka na volleyball na harim ol gospel hits long PNG.

Nem: Nathan Sam
Krismas: 15 (man)
Adres: Mazam village, Garam Community school, Code 550, C/- Mutzing Markham district, Lae, Morobe Province
Save laikim: Tok pilai na raun wantaim ol poroman, pilai spot, bekim ol pas, go lotu na harim ol gospel musik.

Nem: Jacob Miambaura
Krismas: 14 (man)
Adres: Wara Kindam, P O Box 682, Kimbe, WNB
Save laikim: Harim gospel musik, go lotu, Stadi long skul, bainim ol poromeri long Sunbohn na Tumbuka Ninu Muwra Nanu Tauli Nani Gai

Nem: Bayden Nalong
Krismas: 17 (man)
Adres: P O Box 269, Biella, WNB
Save laikim: Pilai spot, railim pas, tok pilai na raun lukim ol arapela ples.

Nem: Justine Zirau
Krismas: 16 (man)
Adres: Holy Spirit Memorial High School, P O Box 750, Bogia, Madang Province
Save laikim: Pilai basketbal, daiv long solwara, laikim long ritim buk, harim ol lokol na pop musik na tok pilai wantaim ol poroman.

Nem: Bruno Thomas
Krismas: 19 (man)
Adres: TFI Morere Base Camp, P O Box 184, Port Moresby
Save laikim: Wok mani, mekim pren wantaim ol arapela lain, harim pop musik, pilai soka.

Nem: Abdul Mumin Yusif Akib
Krismas: 13 (man)
Adres: P O Box 449, Cape - Coast Ghana W/A
Save laikim: Mekim pren wantaim olgeta lain, railim pas, save laikim tru long mekim penpren wantaim olgeta lain.

Nem: Abdul Rawuf Yusif Akib
Krismas: 10 (man)
Adres: P O Box 449, Cape - Coast Ghana W/A
Save laikim: Mekim pren wantaim olgeta lain, railim pas long olgeta hap kantri, pilai spot, na senisim ol pota na presen.

KANAGE

"Em nau, narapela wik bilong mi ken"



Lapun Kanage slip long haus long ples Gabensis na Kanage salim tingting long bipo yangpela bilong em, em i save raun long hap bilong ol waitman. Kanage slip na em salim tingting long wanpela taim na em i stap long PNG na baga kisim balus long PNG na go daun long Ostrelia. Na wanpela waitmeri kisim em na tupela i go long haus na waitmeri ya tokim Kanage long tupela bai kaikai maus.

Roland Jerry
Lae, Morobe provins.

Kanage bilong ples Barupu. Long moning em long Barupu lagun. Em i pul painim pis, em i painim pis i go o o na em i hangere, okey. Em i pul i go long ailan na painim drai diwai na rabim na i lait, em i wokim paia na kukim tro-ow em nem bilong pis, na em i kaikai wantaim Hoi em i kaikai pinis na em i painim wara bilong dring na em i wok long raun raun painim wara yet na nogat wara na em pulim kanu na em i pul. Em i pul i go na lukim wanpela meri Sissano na em i askim em, kain bilong Kanage ya, nek bilong em tu i drai, em i kirap na askim hey susa, if you got some water in your please stick? Em i laik kolim plastik, tasol tro-ow i pasin nek bilong em na tromoi nating na meri ya lap stret, hey! Its not funny me talk. Meri yu kilim laplap yet, isi isi tasol na meri ya singaut, hei Kanage kain tokpisin bilong meri Sissano, em i tok Ka-na-ge kam kisim wara botol plo yu a-a- plo mi, yu li-ring na hap stap long pepi plo mi! Pepi plo yu em mi ya em meri ya kirap na tok. Kain plo yu ya! Kanage kirap na tok, na yu tok, Kanage kirap na givim plestik wara long em, na laik tokim em tenkyu, tasol tang i abrus liklik na em i tok tenpela long yu.

Romó pako
Aitape, Sandaun provins.

Kanage tokim em, em raitpela disisen. Prenmeri tokim Kanage, hau bai mi save taim yu kam? Baga ros tokim prenmeri olsem em bai werim kauboi kep, long jin trausis, jin siot na werim dak spek na karim tupela sutkes. Prenmeri tokim Kanage olsem em bai werim solpela kat jin, werim ailal, plagim aibro na werim top. Holide na Kanage kisim haifilings stret na go long ples balus. Long ples balus Kanage kalap long Nesen Aviesen na balus i tekov. Kanage tingting planti long lukim prenmeri. Hau em luk. I no long taim na balus i go len long ples balus. Pren meri lukim em na givim sixti go holim pasim Kanage. Man Kanage em kisi:m moa, moa haifilings stret. Prenmeri wantaim Kanage stori liklik taim tasol na kago boi kisim tupela sutkes i kam putim long feminal. Prenmeri bilong Kanage tok long Inglis. "Could I help you." Kanage kirap na bekim long Inglis "Its ok no problem I can handle it." Taim baga ben daun long kisim. Tupela sutkes kauboi kep. Bilong em win i towim i go na prenmeri



YES, KANAGE,, YU GAT PROBLEM O WANEM?

YUFERA OL PORIS YOO,, YUFERA MAS RUKAUTIM MIFRA ORO GLASLUTS,,, ORO LASIKOL I BLUKIM PANS FLO MI NA ORO BLUKIM AS FLO MI NA ORO STIRIM OROKETA SAMTING FLO MI!

JADA 99!

kirap nogut. Na tokim em, "When I heard your voice in the telephone, i thought that your're your bai but now I see Keroiya. Na tekov lusim Kanage long ples balus. Kanage sem pipia stret na kalap long balus na kam bek.

Mol M.
Sinex Yaliom

Kanage bilong Sepik i kam wok long Kimil Paradais Lodge insait long Hagen. Wanpela taim ol Kariarts Ben bilong Malanga M.C.S i bin kam pilai long KP Lodge. Dispela taim Misis Kanage i nogat mani long dring na banis wantaim meri pren bilong em. Em i go na sakim dinau mani long bos bilong em na bos i givim K50.00 long Kanage. Wanpela kum katim meri i salim bia. Kanage sindaun na dring i stap em i harim wanpela singsing ol kalabus i singim holim sanap na tambilo i guria. Aboso na Harap tasol tokim meri salim bia long danis wantaim em? Taim tuela banis i stap pispis i bagarapim Kanage na em i go pispis long gras na meri ya i tokim em? Kanage olsem wanem nogat rot i go long Toilet ya? Na Kanage i bekim maski mi sakap ya larim mi pispis long gros. Wara bai ron i go long toilet yu kisim taim ya, ya MCS."

Peter Jim
Mt Hagen

Kanage em boi Sepik, em haitim rot i go na bungim wanpela man Simbu. Man Simbu i spak nogut na holim wanpela botol tasol i kam na givim long Kanage. Kanage holim botol na stat long toktok wantaim na tupela botol na stat long toktok wantaim na tupela kilim stori i go. Bra:a Kanage pinisim olgeta mauswara stret i go i go na Simbu tanim het stret long Kanage. Em tanim na tokim Kanage. Yu harim yu noken ham-bak. Mipela ol Simbu 3-pela provins larim wanpela em: Isten Hailens, Westen Hailens na Sauten Hailens. Man paia bilong Kanage dai olgeta. isi tasol boi ya kirap na tokim Simbu olsem mipela ol Sepik i gat wanwan

provins bilong mipela harim Is Sepik, Wes Sepik na Saut Pasifik.
Agustin P. Winzin
Kimbe

Kanage bilong ples Aitape. Em Kanage meri. Haus bilong Kanage i gat ol blak anis na em i nogat motein long spreym ol anis. Na Kanage go lukim pikinini meri bilong em na em i tok daugther! Mi laikim modes bilong yu long go spreym anis. Na pikinini bilong Kanage sanap tingting i go na askim Kanage. Wanem samting yu tok long em. Kanage isi tasol tanim na tok sorry Motein.

Dobby Dannie
Aitape

Kanage em i bilong Mumeng na em i wanpela bikman bilong ples Kumalu. Olgeta taim em i save i gos alim daka bilong em long maket long Mumeng. Wanpela taim em i redim olgeta daka long wanpela basket na em i wokabaut i go long maket, em i go stap long maket inap long apinun na em i no save olsem ol rasikol manki i katim waia banis bilong em na ol i go insait long haus bilong em na stilim olgeta samting bilong em na haus i stap nating. Taim em i go kamap long haus bilong em na em i lukim olsem olgeta samting i no stap na em i singaut nogut tru na em i go sekim olgeta waia banis na em i lukim olsem ol i katim waia banis na ol i go insait long haus. Na bikman Kanage em i bel kaskas nogut tru na em i go putim ript, taim em i go kamap long plis stesin, wanpela plis man i askim em. Yes, wantok yu gat tok, na Kanage i tok, yupela plisia yupela i lukluk long mipela grasrut holim a, ol lasikol i katim baksait bilong mi na ol go insait long as bilong mi ol i stirim olgeta samting bilong mi na as bilong mi i stap nating tru, na plisman hia i paul olgeta.

Nickson B. Charlson
Lae

Papa Kanage em i bilong ples Dogur long Wes Kos long Wewak. Kanage wantaim wanem o kantri

bilong em hsuat i ai pas liklik i save wok kopra long salim na kisim liklik mani bilong tupela long baim rais na tinpis. Long wanpeal Sande moning, tupela i no go lotu na tupela go wok long singaut olsem. Wok kopra em mi ya, na em pasim laplap bilong em strong. Em nau i tokim ai aps wanem bilong em olsem, bai mi go antap long ol kokonas na daunim ol drai pas antap na wok bilong yu long bungim ol long wanpela hap. Yu save papa Kanage em i no man bilong werim andawe olsem na em hariap long pundaunim old rai i kam daun. I no long taim em popaia na holim wanpela drai pangal na em pundaun i kam daun. Ai pas wanem bilong em ting olsem wanpela drai kokonas i pundaun na em pilim long han i go long hap ples em pundaun. Wanem bilong em pilim i go na putim han antap stret long bagaros bilong papa Kanage na em singaut i go antap long kokonas olsem, hei wanem Kanage, dispela drai i gat kuru ya. Tasol em i no save olsem blakpela ai bilong papa Kanage i tanim na waitpela ai i kisim ples.

Martin Niue
lalibu

Kanage em bilong ples Hailans wanpela taim em kam raun long Wewak na em putim wanpela poroman bilong em na poroman bilong em i amamas long putim em long Wewak na em kisim em long ka bilong em na tupela ron i go olsem long Sepik haiwe taim tupela stap namel long rot wanpela trangu i kisim wanpela snek i go na em lusim. Snek em pundaun antap long Kanage. Kanage em i no save long wanem samting ol i kolim snek taim em lukim skin bilong snek em i singaut nogut tru em kisim snek na em putim antap long maus bilong em na em i laik katim stret. Snek i kaikai maus bilong Kanage na tokim olgeta na taim Kanage laik singaut em pekpek wara long trausis bilong em poroman bilong Kanage lukim olsem na em askim em Kanage yu wokim wanem ya na taim Kanage stori long em na poroman bilong

Kanage i tokim em olsem dispela sem ting ya yu mi no save pilai pilai long em. Em sem ting nogut ya em kaikai yu bai yu idai ya em tokim em olsem na em stret na em i laik kalap na ronawe i go na em pundaun long kolta na em brukim net bilong em na em idai.

Samson Urahuasi
Wewak

Kanage baim wanpela laip kakaruk long maket na go long haus. Tasol long rot em senisim tingting na em go long haus piksa. Em sem long ol manmeri lukim kakaruk olsem na em haitim insait long fran trausis bilong em. Em go insait na sindaun klostu long tupela meri. Wanpla bilong Papua na narapela bilong Morobe. Piksa i gutpela tru na Kanage i salim tingting long piksa. Na em i no save olsem kakaruk i putim het i kam ausait pinis long trausis bilong em. Meri Papua klostu long em lukim toktok isi tasol long meri Morobe. "Lukim samting nogut bilong man ya pastaim." Na meri Morobe tok: Man yu no save lukim samting bilong ol man yah! "Olgeta samting bilong olgeta man long dispela graun i wankain tasol. Tasol meri Papua i no wanbel na bekim. Tasol dispela bilong em kaikai popkon bilong mi ya!"

Eddie O.
Lae

Kanage em bilong Hayafaga long Henganofi, Isten Hailens provins. Wanpela taim em lokol turis i go long K92 na em go wan seikol long maket na bihain em wokabaut i kam antap. Yu save pasin bilong Kanage ya wanem kain kala 3 seikol nem model abrusim ol em wok na nek i drai na em go insait long Tiyofo haus kaikai. na em putim han i go insait long poket na pulim het bilong Somore na givim long barlesa na em tokim em long givim em wanpela yoisis na coke wara. Barlesa harim na em paul em bai givim wanem samting long brata Kanage.

Pajiho Hingo
Kainantu

**WOK BISNIS
MANDE IGO FRAIDE**

TELIPON:
325 2500

**WANTOK
KLASIFAIID**

Niuspepa bilong Yumi Stret, Kamap long olgeta Wik

ADVETAISIN SEILS

| | |
|---------------|---------|
| Miri Aiori | ext 214 |
| John Iagata | ext 217 |
| Walumi Arapak | ext 213 |
| Resin Totil | ext 218 |

Ringim mipela Nau!

PAINIM WOK, PABLIK NOTIS, TOKSAVE, BETDE GRITING, BILONG SALIM na TOK SORI.

P A B L I K N O T I S

Benk Akaunt wantaim Benk bilong Papua Niugini

I gat planti toktok stori nambaut olsem o tok-tok ol promotas bilong ol fast money schemes i mekim i go long ol investas bilong ol olsem ol i gat diposit long Benk bilong Papua Niugini (BPNG). Mipela i laik toksave long ol investas bilong ol dispela lain olsem BPNG em Benk bilong gavman na ol narapela benk tasol, na i no Benk bilong wanwan manmeri, orgenaisesin o kampani.

Olsem na BPNG i no wok olsem benk bilong wanwan manmeri, oganaisesin na kampani, olsem na em i nogat akaunt bilong fast money scheme. Wanem ol moni i kam long narapela kantri i save go long ol narapela benk olsem ol komesel benk. Ol i gat tok orait long dispela wok long wok wantaim moni i kam ausait long PNG o narapela kantri. Na sapos ol moni i kam tu, em ol moni bai i go insait long ol akaunt bilong ol dispela schemes long ol wanwan benk ol i save benk long en.

Mipela save olsem Nekong International Investment Corporation, Coral Pacific International Ltd na Millennium Corporation Ltd tasol i gat benk akaunt wantaim ol komsel benk.


Ol promotas bilong ol fast money scheme i bin mekim ol claim na tok olsem BPNG i mekim hat long ol long kisim moni i kam insait long PNG long ol narapela kantri. Dispela ol claim o toktok em i no tru. BPNG i nogat pawa o authoriti long mekim dispela pasin sapos ol moni ol i kisim i kam long PNG em ol i kisim long pasin bihainim lo. Na tu ol lain long fast money scheme i no bin toksave long BPNG long ol dispela ol moni ol i laik kisim i kam insait long PNG sapos dispela moni i stap. Ol client bilong ol fast money schemes long narapela kantri tu i no bin givim dispela kain tok-save tu.

I kam i nap nau nogat lain long ol fast money schemes i bin givim toksave o infomesen em mipela askim ol long givim long ol pas mipela salim long ol long Septemba 1999. Ol papa o ol promotas bilong ol dispela fast money schemes i mas bekim ol moni bilong ol investas nau. Ol i noken wetim BPNG long mekim moa toktok.

Benny Popoitai
Manager
Banking Supervision & Exchange,
Control Department

BENK BILONG PAPUA NIUGINI





• Golkipa bilong Word Publishing Haoda Bernard i redi long autim bal egen-sim Fairdeal long Praivet kampani netbal resis. Fairdeal i win 32-13.

• Pilaia bilong Fairdeal i laik kesim bal tasol ol pilaia bilong Word Publishing i blokim em long Praivet netbal resis long las wiken.

• Tupela pilaia ya bilong Oiyabia na Simla resis long kisim bal insait long EPC soka gren fainel. Simla i win long penalti 7-6.

• Susa ya i kaikai tit stret long pitsim bal. Ol dispela kain stail save kamap long Bisini sofbal graun long Sarere.

• Praim Minista Sir Mekere Morauta i wokabaut long Pot Mosbi Golf klab las wik. Dispela wokabaut em long train wokim sampela mani bilong PNG Spots Federesen.

PNG ino putim nem long 2002 Wol kap kwalifaia

PNGFA RIPOT

HENRY MORABANG i raitim

PAPUA Niugini Futbol Asosiesen (PNGFA) i no bin givim nem long stap insait long kwalifaing resis bilong 2002 Wol Kap soka. Dispela resis ya em Saut Korea na Japan bai holim.

Wantok i painimaut taim ol Ogenaising Komiti i tokaut long dro bilong kwalifaing gems long Yurop, Esia, Saut Amerika, Afrika na Osenia.


Insait long Osenia ol arapela tim olsem Fiji, Tahiti, Solomon Ailans na Tonga (Pul A) na long pul B, Samoa, Cook Ailan, Vanuatu na Amerika Samoa.

Tupela biknem soka kantri long Osenia Australia na Nu Silan bai go pas long dispela tupela pul ya.

Sekretari bilong PNGFA Ivan Ngahan i tokim Wantok olsem opis bilong em i no givim nem bilong PNG bikos em i no redim wanpela tim.

Ngahan i tok long bihainim tingting bilong PNGFA Teknikel Komiti, PNGFA i ting olsem PNG bai nogat sans tru long dispela resis ya.

Siaman bilong Teknikel Komiti Kisakiu Posman na komiti bilong em i pasim toktok



• Jenerel sekretari bilong PNGFA Ivan Ngahan

olsem PNG i nogat sans tru egensim Australia, Nu Silan, Fiji na Solomon Ailan. Dispela ol kantri i wok long strong tru na soka long PNG i wok long dai isi.

Las taim PNG i stap long kwalifaing gems em bihain long em i winim Melanesian Kap na em i salensim Nu Silan na Fiji long 1988.

PNG i bin winim wanpela gem tasol egensim Nu Silan 1-0 long Sir Hubert Murray stedium

tasol em i lus long taim ol i go pilai long Nu Silan na Fiji. Fiji tu i kam na wilwilim stret PNG 5-1 long Pot Mosbi.

Ngahan i tok wanem tim i winim Osenia rijen bai salensim namba faiv ples long Saut Amerika. Long lukluk bilong ol saveman bilong soka, Australia bai gat arapela sans gen ya.

Jenerel sekretari i tok olsem PNGFA nau i putim ai long 2006 Wol Kap. Olsem na em i wok long strong long yut developmen program bilong en.

Bikpela yut program nau em long Anda 23 tim we bai go pilai long Nu Silan long pinis bilong dispela wik.

Dispela Anda 23 bai karim nem bilong PNG long ol yia bihain. Arapela yut tim em Anda 20 na Anda 17. I tru Anda 17 tim i no go stap insait long kik resis long Nu Silan we i bin pinis long las mun, dispela i soim tru olsem PNGFA i no redi olsem na em i no salim tim. Brazil i bin winim Australia 8-7 long fainel ya.

Ngahan i tok Anda 20 Wol Kap sempionsip bai kamap neks yia. PNGFA i tingting long salim wanpela tim olsem na em i strong long makim ol yangpela husat i stap long trening skwat. Em i no tokaut long we dispela Anda 20 Wol Kap bai kamap ya.

Bears laki long winim Gazelle

POM WOMENS SOFBAL RIPOT

AB Bears i laki tru long winim Gazelle 6-5 long bikpela gem bilong Pot Mosbi wimens sofbal kompetisen long Sarere.

Taim AB Bears i go pas wantaim skoa 4-0, ol i wok long pilai slek nau na Gazelle i kirapim paia stret long traime winim dispela gem.

Gazelle i stat long skorim poin long namba foa ining we Jenny Pilaik, Regina Rarang, Mectil Tonga Jnr na Josephine Chan i kam hom. Dispela i levelim skoa wantaim AB Bears.

Gazelle i go pas long skoa insait long namba siks ining taim Pilak husat i kamapim gutpela gem long kam hom na skoa i sanap 5-4.

Em nau skin i wok long kirap, na tupela tim wantaim i wok long painim gem plen long traime winim gem. AB Bears i tingting planti nau bikos ol i sempion tim, na sapos ol i lus long Wendy Katusele na ol geng bilong em bai sem ya.

Tasol AB Bears i no wari. Mama bilong klab Delin Bais i kamapim wanpela gutpela gem na paitim bal i go long rait autfil long bringim Helen Tata i kam hom long levelim skoa 5-5.

Orait Tata yet i kam hom long winim dispela gem 6-5. Insait long arapela ol gem, Mazda winim Norths na Wantoks i wilwilim stret Chebu 19-1.

Unicats daunim NGI

MT HAGEN SOFBAL RIPOT

POST PNG Unicats i wilwilim stret biknem Coca Cola NGI 8-1 long Mt Hagen mens sofbal resis las wiken.

Na insait long arapela ol gem, Malangan fofitim United na Royals i nekim Wantoks 8-3 long wimens divisen.


Kepten bilong NGI Danny Matts i winim tos na askim long bet. Orait insait long namba wan ining, Unicats i stapim olgeta win bilong NGI na nogat wanpela skoa i bin kamap long dispela ining.

Unicats i no westim taim taim Kuvo Maradi i paitim wanpela gutpela bal bringim Jeffrey Panuel long kam hom, na arapela pilaia Jerry Tolam long ran i go long namba tu bes long givim spes long em.

Tupela daun na Eremas Lesley i paitim wanpela bikpela bal i go long autfil we em na Maradi i kam hom. Vitalis Tiriman i aut na Tony Augustine i sanap long namba long namba wan bes.

Long namba tu ining, Joel Jones, Vincent Norlick na Nelson Malum i kamapim sampela strongpela pilai tasol ol i asua long paitim bal i go stret long ol pilaia bilong Unicats long ketsim.

Long pinis bilong namba foa ining, Unicats i wok long kamapim strongpela presa long stapim NGI na tupela pilaia bilong em Vitalis Tiriman na Lesley i pinisim gem wantaim gutpela ran long win 8-1.



• Beta bilong MSC i redi long paitim bal egensim Elcom long Pot Mosbi mens softbal kompetisen las wiken. MSC win 4-1. Foto: Issac Ikuavi

Gazelle stapim win bilong Hawks

POM MENS SOFBAL RIPOT

GAZELLE i stapim win bilong Hawks namba tu taim long Pot Mosbi mens sofbal resis long Sande. Gazelle i win 2-1.

Dispela lus i kamap bihain long ol i winim Brown Eagles long Sarere. Dispela gem em ol i no bin paiti bipo bihain long wanpela pilaia bilong Hawks i dai.

Maski Hawks i lus, ol i holim yet namba wan posisen long poin lata. Na Gazelle i surik i go antap long poin lata long sindaun wantaim Aisi Bishman Bears.

Gem namel long AB Bears na NGI i no pinis gut bihain long bikpela ren i bin kamap long Sande.

Skoa bilong arapela gem i sanap olsem Brown Eagles i sakim strongpela salens i kam

long Malangan long win, MSC winim Elcom 4-1, Manalos klostu i lus tasol ol i strong long las minit long win 4-1 na Raiders autim Tigers.

Poin lata nau i sanap olsem Hawks 16, Bears 15, Gazelle 15, Manalos 12, Brown Eagles 11, Burmah Raiders 10, MSC 8, Malangan 8, Elcom 6, Tigers 2 na Dolphins 2.

Gazelle i kamapim gutpela beting olsem na ol i winim Hawks

Biknem Tony Daple i go pas long ol pilaia bilong Gazelle long stapim ol Hawks long i no skoa insait long tripela ining.

Hawks i bet pas tasol hankais pita bilong Gazelle Paskalis Pina i salim tripela ol beta bilong Hawks i go bek long bens.

Daple i opim beting oda bilong Gazelle long paitim wanpela gutpela bal long go sanap long namba wan bes. Daple i no inap long winim seken bes bikos Peter Urari i no paitim gut bal na ol i autim em.

Urari i kam hom bihain long Paia Martin i paitim wanpela gutpela sakrifais hit long bringim em i kam hom.

Pitsa bilong Hawks Cornia Kirita i wok long givim hat taim long ol biknem beta bilong Gazelle. Kirita i wok long kisim gutpela sapot pilai i kam long Sialis Taman.

Long namba tu ining, Michael Katas Jnr i gat sans long kam hom taim em i sanap long namba tri bes tasol gutpela pitsing bilong Kirita i stapim em.

Urari i kam hom namba tu taim long insait long namba tri ining taim keta bilong Hawks Taman i no tromoi gut wanpela bal long traime autim Jerry Albert. Skoa bilong Gazelle nau i go long 2-0. Ol beta bilong Hawks i kamapim wanpela gutpela pilai na Nick Mathew i kam skoa long namba foa ining long skoa nau i sanap 2-1.



Wiken Spot Dro

Lae Football Draw

Saturday December 11, 1999.

(Semi Finals)

| | | | |
|-------|------------------------|--------|-------|
| 10.00 | Tolec Buresong vs Bara | R/R | LFA I |
| 12.00 | Mopi vs Bara | Women | LFA I |
| 02.00 | Seminary vs MDC | First | LFA I |
| 04.00 | Mopi vs Bara | League | LFA I |

Sunday December 12, 1999.

(Grand Final)

| | | | |
|-------|-----------------------------------|--------|--------|
| 08.00 | Poro vs Mitif | U14 | LFA I |
| 10.00 | Bulolo Uni vs Winner BB | L/R | LFA I |
| 10.00 | Lae vs Courts (Rest of the World) | LFA I | |
| 12.00 | Titupu vs Winner GC | First | LFA I |
| 02.00 | B.Kumul vs Winner GD | Women | LFA II |
| 04.00 | T.Buresong vs Winner G | League | LFA I |

Results of Minor Semi Finals - 5th/12/99

Teams Division

| | | |
|--------|---------------------|-----|
| Game 1 | Poro vs Blue Kumuls | U19 |
| Score | 2 | 0 |

| | | |
|--------|---------------|-----|
| Game 2 | Mitif vs Mopi | U19 |
| Score | 5 | 1 |

| | | |
|--------|--------------------|-----------|
| Game 3 | Bulolo Uni vs Bara | L/Reserve |
| Score | 5 | 2 |

| | | |
|--------|---------------|-------|
| Game 4 | Titipu vs MDC | First |
| Score | 4 | 2 |

| | | |
|--------|---------------------|-------|
| Game 5 | Blue Kumuls vs Bara | Women |
| Score | 0 | 0 |

| | | |
|--------|------------------|--------|
| Game 6 | Buresong vs Bara | League |
| Score | 4 | 3 |

This teams which qualify for major semi final on Saturday 11/12/99 are:

| | |
|------------------|------------|
| Teams | Division |
| Mopi vs Bara | Women |
| MDC vs Seminary | First |
| Bara vs Buresong | L/ Reserve |
| Bara vs Mopi | League |

Typesetter-PSSA/1328

JMSauto-11-99

08/12/99

NCD Public Servants Soccer draw

Saturday 13th December 1999

University Toa One (1)

| Time | Div. | Fixtures |
|-------|------|-------------------------|
| 08:30 | M2 | NBC vs IRC |
| 09:45 | W2 | IRC vs NBC |
| 11:00 | M2 | Harbours vs Air Niugini |
| 12:05 | W2 | Air Niugini vs Harbours |
| 13:05 | M2 | Works vs BPNG |
| 14:20 | W2 | BPNG vs Works |
| 15:20 | M2 | Defence vs Health |

University Toa Two (2)

| | | |
|-------|----|--------------------|
| 08:30 | M1 | Education vs NAQIA |
| 09:45 | W1 | NAQIA vs Education |
| 11:00 | M1 | Police vs NCDC |
| 12:05 | W1 | NCDC vs Police |
| 13:05 | W1 | Transport vs DCA |
| 14:20 | M1 | DCA vs Transport |

Bye: Pool One PNGBC (Man/Woman)

Sunday 14th December 1999

University Toa One (1)

| | | |
|-------|----|-------------------|
| 08:30 | M2 | Elcom vs UPNG |
| 09:45 | W2 | UPNG vs Elcom |
| 11:00 | W2 | Health vs Defence |
| 12:00 | M2 | Commerce vs NCC |
| 13:10 | W2 | NCC vs Commerce |
| 14:15 | W2 | POSF vs A/General |
| 15:15 | M2 | A/General vs POSF |

University Toa Two (2)

| | | |
|-------|----|-----------------------|
| 08:30 | M1 | NSO vs Cellnet |
| 09:45 | W1 | Cellnet vs NSO |
| 11:00 | M1 | Teachers vs NPF |
| 12:05 | W1 | NPF vs Teachers |
| 13:05 | W1 | Post PNG vs Fisheries |
| 14:20 | M1 | Fisheries vs Post PNG |

Bye: Pool two Telkom (Man/Women)

NCDPSSA Points Ladder

Mens Pool One

| Team | GP | W | D | L | GF | GA | PTS |
|-----------|----|---|---|---|----|----|-----|
| Fisheries | 5 | 3 | 2 | 0 | 10 | 3 | 11 |
| PNGBC | 5 | 3 | 2 | 0 | 8 | 3 | 11 |
| Education | 5 | 3 | 1 | 1 | 9 | 5 | 10 |
| NPF | 5 | 3 | 1 | 1 | 6 | 5 | 10 |
| Cellnet | 5 | 3 | 0 | 2 | 6 | 2 | 9 |
| Teachers | 5 | 2 | 2 | 1 | 5 | 4 | 8 |
| NAQIA | 4 | 2 | 1 | 1 | 4 | 3 | 7 |
| Post PNG | 5 | 1 | 3 | 1 | 5 | 6 | 6 |
| DCA | 5 | 1 | 2 | 2 | 5 | 6 | 5 |
| Transport | 4 | 1 | 1 | 2 | 4 | 5 | 4 |
| Police | 5 | 1 | 1 | 3 | 3 | 5 | 4 |
| NSO | 5 | 1 | 1 | 3 | 2 | 5 | 4 |
| NCDC | 5 | 0 | 1 | 4 | 2 | 11 | 1 |
| Pangtel | 3 | 0 | 0 | 3 | 0 | 6 | 0 |

Womens Pool One

| | | | | | | | |
|-----------|---|---|---|---|---|---|----|
| Teachers | 4 | 4 | 0 | 0 | 5 | 0 | 12 |
| Education | 5 | 3 | 2 | 0 | 6 | 0 | 11 |
| NPF | 5 | 3 | 1 | 1 | 4 | 2 | 10 |
| Fisheries | 5 | 2 | 2 | 1 | 7 | 4 | 8 |
| NAQIA | 4 | 2 | 1 | 1 | 5 | 2 | 7 |
| Police | 5 | 2 | 1 | 2 | 4 | 5 | 7 |
| PNGBC | 4 | 2 | 0 | 2 | 4 | 3 | 6 |
| Cellnet | 5 | 2 | 0 | 3 | 4 | 7 | 6 |
| NSO | 5 | 1 | 1 | 2 | 5 | 4 | 4 |
| NCDC | 3 | 1 | 1 | 1 | 3 | 3 | 4 |
| Transport | 3 | 0 | 2 | 1 | 1 | 3 | 2 |
| Post PNG | 4 | 0 | 2 | 2 | 2 | 5 | 2 |
| DCA | 4 | 0 | 1 | 3 | 2 | 6 | 1 |
| Pangtel | 3 | 0 | 0 | 3 | 0 | 6 | 0 |

Mens Pool Two

| | | | | | | | |
|-------------|---|---|---|---|----|----|----|
| A/General | 5 | 5 | 0 | 0 | 12 | 1 | 15 |
| BPNG | 5 | 4 | 1 | 0 | 9 | 3 | 13 |
| Air Niugini | 4 | 4 | 0 | 0 | 7 | 1 | 12 |
| Elcom | 4 | 3 | 1 | 0 | 7 | 1 | 10 |
| Telikom | 5 | 3 | 1 | 1 | 6 | 5 | 10 |
| Commerce | 5 | 2 | 1 | 2 | 5 | 6 | 7 |
| POSF | 4 | 1 | 1 | 2 | 2 | 2 | 4 |
| Works | 3 | 1 | 1 | 1 | 1 | 1 | 4 |
| Harbours | 3 | 1 | 1 | 1 | 1 | 1 | 4 |
| IRC | 5 | 1 | 1 | 3 | 6 | 7 | 4 |
| Health | 4 | 1 | 1 | 2 | 5 | 8 | 4 |
| UPNG | 5 | 0 | 2 | 3 | 3 | 10 | 2 |
| Defence | 5 | 0 | 1 | 4 | 0 | 8 | 1 |
| NCC | 5 | 0 | 0 | 4 | 2 | 8 | 0 |
| NBC | 3 | 0 | 0 | 3 | 0 | 6 | 0 |

Womens Pool Two

| | | | | | | | |
|-------------|---|---|---|---|---|----|----|
| BPNG | 5 | 3 | 2 | 0 | 5 | 1 | 11 |
| UPNG | 5 | 3 | 1 | 1 | 8 | 2 | 10 |
| Elcom | 4 | 3 | 1 | 0 | 5 | 1 | 10 |
| A/General | 5 | 2 | 3 | 0 | 4 | 0 | 9 |
| Works | 4 | 3 | 0 | 1 | 6 | 3 | 9 |
| POSF | 4 | 3 | 0 | 1 | 4 | 2 | 9 |
| Telikom | 5 | 2 | 2 | 1 | 5 | 1 | 8 |
| IRC | 5 | 2 | 1 | 2 | 6 | 3 | 7 |
| Defence | 5 | 1 | 3 | 1 | 5 | 3 | 6 |
| Health | 5 | 2 | 0 | 3 | 5 | 8 | 6 |
| Harbours | 4 | 1 | 1 | 2 | 3 | 3 | 4 |
| Air Niugini | 5 | 1 | 0 | 4 | 3 | 10 | 3 |
| Commerce | 5 | 1 | 0 | 4 | 2 | 10 | 3 |
| NBC | 4 | 0 | 2 | 2 | 1 | 5 | 2 |
| NCC | 5 | 0 | 0 | 5 | 0 | 10 | 0 |





• ANTAP: Tas gren fainel eksen namel long ol tupela Wanigela , Broncos na Raiders long Llyod Robson oval long Pot Mosbi.

• ANINIT: Oi Praivet kampani netbal eksen long Pot Mosbi last wiken.



WANTOK SPOT



Anda 23 redi long Nu Silan

HENRY MORABANG i raitim

NESENEL Anda 23 soka tim bilong Papua Niugini i redi nau long go stap insait long kik resis bilong Osenia Wol Kap kwalifaia long Auckland, Nu Silan neks wik.

Tim bilong PNG bai lusim kantri long dispela wik Fraide long go stap long dispela soka sempionsip.

Namba tu kosa Geoffrey Emang i tokim Wantok olsem tim i wok long tren gut na bai redi tasol long bungim ol birua tim. PNG bai salensim Vanuatu Disemba 13 na

Nu Silan, Disemba 16. Olgeta gem ya bai kamap long Bill McKinlay Park.

Bikpela wok bilong Emang na hetkosa John Davani em bilong stretim ol eria we ol i no gutpela taim ol i lus nogut tru long Solomon Ailan. Insait long namba wan gem, Solomon Ailan nilim PNG 5-0 na long namba tu gem, Solomon Ailan win gen 2-0.

Bihain long wanpela wik trening nau, Emang i bilip olsem ol boi bilong em i redi long salensim Vanuatu na Nu Silan.

Davani nau i singautim tripela Pot Mosbi pilaia olsem Desmond Sow (Cosmos), Rodney Pulu (Cosmos) na Eric Willie

(Yunivesiti) long kisim ples bilong tripela pilaia bilong Kimbe em PNGFA i rausim ol.

Ol tupela Kimbe pilaia i sakim tok bilong PNGFA long go pilai long soka resis long Manus we Manus i no memba bilong PNGFA. Arapela pilaia Michael Sio em i kisim bagarap na i no inap stap long tim.

Tim tu i mekim bikpela tok amamas i go long Coca Cola long sapatim tim long bag, t'siot, na plastik wara bilong dring na MRDC long siot bilong putim na wokabaut olsem tim.

Tim bilong PNG em: David Aua, Hans Fred, Bobby Kenkava, Alu Kamake,

Ludwig Vuri (Lahi), Bradley Bakuwai, Brian Tuhiana, Adolf Horris, John Ngahan, Trevor Ire, Desmond Sow, David Kaepapa, Eric Willie, Reginald Davani, Paulo Patterson (Pot Mosbi), Julius Peka, Mark Kelep, Ken Gule (Lae), Isaiah Jonah (Kaiapit).

Pulu em i stap olsem riserv.

Moses Demas em tim menesa, John Davani em het kosa na Geoffrey Emang em namba tu menesa na kosa.

Joe Turia bai wokabaut wantaim tim olsem teknikel dairekta na tu mausman bilong PNGFA long miting bilong Anda 23.



• (Lephan-raithan) Sir John Dawanincura, Sir Mekere Morauta, Sir Henry ToRobert na Edvens Operesen Osenia menesa Toshio Tsurunaga i sekim na lukluk long Olimpik Tos we bai kam wantaim paia long Mas neks y ia. Poto HENRY MORABANG.

SOGOC i amamas long rot bilong Olimpik Tos

HENRY MORABANG i raitim

OL OPISEL bilong Sidney Olimpik Gems Ogenaising Komiti (SOGOC) i amamas tru long ol wok redi bilong rot bilong Olimpik Tos.

Menesa bilong Edvens Operesen long Osenia rijon Toshio Tsurunaga rot we Olimpik Tos bai ran long em i gutpela tru. Rot bilong Olimpik Tos i no senis. Ol liklik senis em Olimpik Tos bai stap long Pot Mosbi Ragbi Lig oval na Sir Hubert Murray stedi-um.

Tsurunaga i tok bai i no gat ran long karim Olimpik Tos long Owers Corners na kam long Depo.

Long Depo, ol bai bringim Olimpik Tos i kam long 17 mail o'9

mile we namba wan man long karim tos bai stat long ran kam insait long siti.

Taim dispela tos i stap long Pot Mosbi, em bai pulim planti ol niusman long kam kisim poto na stori bilong kantri.


Insait long PNG dispela Olimpik Tos bai ran long 58km we K18 em Olimpik Tos bai stap antap long ka.

Giaman Olimpik Tos ran bai kamap long May 6 long yia 2000. Na Olimpik Tos yet bai kamap long PNG long Me 27 na bai stap long PNG inap 7-pela hawa olgeta na bihain balus bai kisim i go long Guam.

Nu Silan bai las kantri long holim Olimpik Tos na bihain em i go long Australia. Long Australia, dispela Olimpik Tos bai stap 100 de olgeta na bihain em bai kamap long bikpela de long Septemba 15.

Em i Gutpela
Em i Tuna
Em i bilong
PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.